

MGA HEBREOHANON,

KAPITULO TRES

 Maayong buntag, mga higala. Usa kini ka pribilihiyo nga maania niining buntaga sa buluhaton sa Ginoo. Ug nagalaum kita ug nagasalig alang sa usa ka halangdon nga higayon.

² Dinha ako sa luyo sa...ginatawag namo kaniadto nga opisina sa mga diyakono, kon diin dinha na karon nakaplastar ang mga rekorder, ug nagpakig-istorya ako sa usa ka batan-ong babaye ug sa iyang inahan dinha sa luyo, nga gikan pa sa Joliet, Illinois. Ug napamalandongan ko nga ang maong babaye usa ka pagkamaanindot nga bunga sa grasya sa Dios. Kadaghanan sa ato dinhi nakaila man sa iyaha. Siya'y usa—usa ka palahubog kaniadto, usa sa pinakagrabe. Ug dili pa gyud ingon ka klaro sa ako ang maong istorya hangtud niining buntaga, bahin niadtong minaug siya sa entablado. Gipadayag man kaniya sa Ginoo ang tibuk problema ug kung unsa ang mahitabo. Ug minaug siya dinhi sa entablado, nga nagahilak ug nagakalipay tungod nga giluwes siya sa Dios gikan sa—sa lubnganan para sa mga palahubog. Ug siya...May usa ka babaye nga miduol sa iyaha ug misugod pud nga mihilak, tungod nga ang iyang anak nga babaye, nagatoo ko nga anak siya sa babaye, usa kono ka adik sa droga. Ug kabalo mo, tungod sa grasya sa Dios, natawag ang maong batan-ong babaye (sa hunahuna ko, pagkasunod na nga gabii kadto, si Rosella, kadtong natawag?), ug ang batan-ong babaye, gikan sa pagka-adik sa droga, naayo gyud siya. Ug siya ug ang iyang bana nagawali na karon sa Maayong Balita. Ug—ug—ug pagkanindot nga makita ang usa ka matahum nga batan-ong babaye nga sama ni Rosella, nga ingon na gyud ka hingkod! Ug karon siya'y, matarung na kaayo, aduna siya og...nabati niya nga may usa ka pagtawag sa iyang kasingkasing. Apan, ingon nga hingsayran niya ang ginaingon sa Biblia mahitungod sa mga babayeng magwawali, kita n'yo, nasayod siya nga lahi kini nga pagtawag. Ug mao nga ginapangunahan siya sa Dios ngadto sa mga bilanggoan ug uban pa, aron maghatag og testimonyo.

³ Pagkaanindot gayud nga—nga—nga hibaloan, nga pangitaon ang kabubut-on sa Dios. Usahay aduna kita'y pagbati, pero gusto natong dalhon kana nga pagbati ngadto sa kung asa man; og kung dili kamo magbantay, gamiton sa yawa kana nga pagbati ug tuison kana nga mamahimong usa ka butang. Apan basta nagapabilin lang kita sa Biblia, kung ingon-ana anaa kita sa husto, nakita n'yo, nagalihok kita sumala mismo sa kabubut-

on sa Ginoo.

⁴ Ug busa nagatoo ko nga—nga sa katapusan moadto na si Rosella ngadto sa natad sa pagpangmisyon sa kon asa man, tungod kay dili man gusto sa Amerika ang Ebanghelyo.

Nasayod na kamo niana. Mas maayo pang dawaton na nato, nga, kining mga Anglo-Saxon wala na gayud. Kana lang. Wala na'y Ebanghelyo nga dawaton pa sa Amerika. Oh, hinoon aduna ma'y pipila nga magakaylap, sa karon ug unya. Apan, kung ang Ebanghelyo mismo, tapos na kini. Ug dili ka na gani makawali sa ilaha, ni masultihan sila. Wala na sila'y unsa man nga toohan. Kita n'yo? Tungod aduna man sila'y kaugalingon nilang mga ideya, ug sila'y mga gahi'g ulo.

Ug ang sunod nga mga butang para niini nga nasud mao na ang paghukom. Mahiagum gayud siya niini, usab. Tingali'g pinaagi sa pagkunhod sa ekonomiya. Tingali'g pinaagi sa bomba atomika. Tingali'g pinaagi sa usa ka dakung hampak, usa ka balatian o unsa man, pero bisan pa, siya'y mahiagum gayud. Taliabot na kini. Linibo ka pilo ang mangapukan gayud.

⁵ Ngani nakalabay kami, kagahapon, kami ni Igsoong Zabel, sa . . . ug ni Igsoong Wood, gikan mi sa Kentucky, kon diin kami nangadto sulod sa tulo ka adlaw, ug nakalabay kami sa usa ka pabalay nga proyekto. Miingon si Igsoong Zabel, "Walay. . ." Nakalimot na ko. "Halos wala baya sa nianang mga tawo, sa maong proyekto, ang nagasimba man lang."

⁶ Kon pangutan-on mo sila mahitungod niana. "Bueno, aduna man kami'y telebisyon. Mao kana ang among kahupayan." Kita n'yo? Ingon-niana ang taras sa Amerika. Kita n'yo na? "Aduna kami'y telebisyon. Aduna kami og daghang kuwarta. Aduna kami og maanindot nga mga sakyanan, adunay maanindot nga mga balay. Unsa pa ma'y kinahanglanon namo sa Ginoo? Wala na kami nagkinahanglan Niana." Ingon-niana ang ilang panghunahuna.

⁷ Mao nga ang bugtong relihiyon ug kaluwasan nga aduna kita, ug gugma, anaa na lamang sa taliwala sa tinuod nga balaang mga tawo. Kabalo mo, miingon ang Biblia nga mahitabo kana. [Nagaingon ang kongregasyon, "Amen."—Ed.] Uh-huh. Kamong mga nagabasa og Biblia, nadungog ko kamo nga misinggit og "Amen," ug kamong mga magwawali sàb dinha sa luyo. Ingon nga, tinuod kana. Ang gugma mahimong halayo na kaayo, sa kaulahiang mga adlaw; ngani ang bugtong gugma nga mahibilin, anaa na lamang sa taliwala sa Pinili nga mga tawo sa Dios. "Ang amahan mahimong batok sa inahan, ug ang inahan batok sa amahan, ug ang mga anak batok sa mga ginikanan, ug ang uban pa batok sa usa'g usa." Ug ang bugtong gugma nga mahibilin, mao na lang ang sa mga Pinili, ang sa mga Pinili na lamang. Ang pulong "Pinili" nagagikan sa pulong nga "Gipili," ang gipili nga mga tawo sa Dios.

⁸ Ug sa pagsulti ni Rosella sa ako dinha sulod sa lawak, kaganina, bahin niadtong nahitabo sa iyaha gihunahuna ko, nga, niadtong gabhiona mismo, ingon siya nga aduna gyu'y nahitabo. Ug grabe gyud kono, ingon siya, nga sa tibuok niyang kinabuhi, kaniadtong nahimo siyang, usa ka grabe ka palahubog, nga wala na'y nahimo, bisan ang Alcoholics Anonymous, og misurender na sa iyaha ang upat ka doktor, tungod nga wala na gyud kono'y mahimo pa, ug daw sa unsa, nga sukad niadtong higayona mismo, adunay nahitabo.

⁹ Mao nga karon dili na siya ingon-niadto nga malibat ang mga mata sa kahubog. Usa na siya ka hiligugmaon, og matahum nga batan-ong babaye nga traynta'y-tres anyos ang panuigon, pero mora pa lang og mga baynte-dos; ingon nga gibuhat gyud sa Dios ang angay Niyang buhaton para kaniya, ug lahi na gayud ang iyang hitsura. Ug, mao nga miingon ko, "Rosella, sa wala pa ang pagkatukod sa kalibutan, gikatagana na mang daan sa Dios kadto nga higayon." Oo, sir. Kita n'yo? Oo. Ug sa dihang si Billy Paul dinha sa luyo, sa iyang nahimutangan, nagahatag og mga prayer kard sa mga tawo niadtong gabhiona, wala gayud gani siya makaila kung kinsa ang mga gihatagan niya og prayer kard.

Dili ba kadto kahiribulongan, Rosella?

[Nagaingon si Igsoong Rosella Griffith, "Igsoong Branham, puede kaha'ng mag-ampo ang iglesia nga giyahan kami sa Dios, ingon nga Siya man gayud ang gamhanan."—Ed.]

Amen. Panalanginan ka sa Ginoo, Rosella. Sigurado ako nga buhaton nato kana. Buut niyang mag-ampo unta ang iglesia nga ang Dios magagiya kaniya. Aron nga, monunot siya sa Iyang walay-pagkausab nga kamot. Oh, maayo gyud kana.

¹⁰ Gihanyagan diay ako og usa ka dakung tanyag, karong buntaga. Mahitungod kini sa usa ka, multi multi multimilyonaryo nga gustong mamuhonan dinhi sa Louisville, Kentucky, ug magpatukod kono para sa ako og lima-ka-milyon-ka-dolyares nga tabernakulo. Apan may sa kung unsang butang sulod sa akong kasingkasing ang miingon, "Kadali lang, dili man ka usa ka pastor." Kita n'yo? Busa, ingon-niana, lima ka milyon ka dolyares kono ang kuwarta nga mahimong igahin. Bueno mahimo man nga mapaingon kana sa gobyerno, aron igasto nila sa whiskey ug mga ingon-anang butang, pero gusto gyud niyang ihatag kana para sa pagpatukod og usa ka tabernakulo alang sa Ginoo. Mao nga nagalaum ko nga mapaingon gyud unta kana sa usa ka alagad sa Dios nga . . . ug sa pipila ka buluhaton alang sa Dios. Tungod, lima ka milyon ka dolyares baya kana nga gigahin para niana. Hunahunaa n'yo, pagkanindot gyud siguro nga tabernakulo ang mapatukod niana.

Mahanduraw mo ba kung unsa kaha ka magarbo kana, Rosella? Pero may sa kung unsang butang *dinhi* nga lahi ang

ginasulti. Kita n'yo? Kita n'yo? May sa kung unsang butang gyud *dinhi*.

¹¹ Nagatambong kita *dinhi* niining gamay'ng, daan na nga tabernakulo, kamong mga bag-ohan usab. Bueno, puede man kining mahimong usa ka maanindot nga bilding *dinhi* sa kanto, wala lang kamo mahibalo, nga dunay mga tawo nga gustong padak-an pa kini nga bilding ug panindoton kini. Pero sa ingon-ani man nato kini gusto. Kita n'yo, sa ingon-ani nato kini gusto. Ngani kanang mga daan na nga lingkoranan nga atong ginalingkoran *dinha*, mao pa kana ang—ang mga karaan og pinakauna nga mga lingkoranan *dinhi* sa tabernakulo, nga nabahaan kaniadto ug nanglutaw intawon.

¹² Bukas kaniadto ang akong Biblia nga nakaingon *niana* *dinhi* sa pulpito. Miabot kini ngadto sa kisame ug sa pagkunhod na sa baha mipaubos kini nga bukas gihapon ang Pulong diha Niining, “Ako mao ang Ginoo nga nagtanum niini. Pagabisbisan Ko kini adlaw ug gabii kay tingali'g adunay pipila nga moilog niini gikan sa Akong kamot.” Misakay na lang gani kami og usa ka sakayan, *dinhi*. Ug sa pagkunhod na sa baha, ang mga lingkoranan nahibalik sàb sa puwesto niini. Gikinahanglan lang nila kaniadto nga limpyohan kini ug para makapadayon na. Kita n'yo? Kita n'yo? Mao nga sa ingon-ani gayud nato kini gusto, kon diin ordinaryo ang mga tawo, ordinaryo ang bilding, ug maayo gayud ang Ginoo. Amen.

¹³ Karon, niining adlaw, aduna kita'y pipila, nagasugod pa lang kitang mopaingon sa krema, kabalo mo, human nga—nga makuha ang tanang gatas, ang krema na lang ang mahibilin. Ug hinumdumi n'yo, nga gikinahanglan ang gatas aron makahimo og krema, kabalo mo. Ang—ang krema mao ang sulod sa gatas.

¹⁴ Bueno nahisgotan na nato ang una, ika-2, ug matapos na kita sa ika-3, ug magsugod na pud sa ika-4 nga kapitulo sa mahimayaong Basahon sa Mga Hebreohanon. Ug, oh, pagkanindot gayud ang mga pagtudlo sa niini nga Basahon! Mahimo gani kitang magpabilin Niini, mahitungod sa usa ka bersekulo, sulod sa tulo ka bulan, ug ipakita nga ang tibuok Biblia nagatakdo mismo sa matag bersekulo sa Biblia. Nahunahuna n'yo ba kana? Wala kamo'y maitudlo ni usa ka bersekulo nga dili nagatakdo, kondili, pinaagi sa grasya ug sa tabang sa Balaang Espiritu, mahimo gyud natong maitakdo Kini gikan sa Genesis hangtud sa Pinadayag.

¹⁵ Wala na'y uban pang literatura nga nasulat sa kon asa man ang makahimo og ingon-ana. Ug sumala sa matematika, ug hiyograpiya, sa tanang anggulo, walay ni usa ka Basahon sa Biblia ang nasulat nga sama sa Biblia... Walay ni usa ka libro sa kalibutan, ang buut kong ipasabot, ang nasulat nga sama sa Biblia. Wala gayud. Ngani ang mga numero sa Biblia hingpit man nga nagakatakdo; bisan ang mga kapitulo, ug

mga panulbok, ug tanan na, hingpit gayud. Wala na'y uban pa nga libro; diin dili ka makabasa og usa ka kapitulo nga dili ginasumpaki ang kaugalingon niini. Apan sa tibuok Biblia wala gyu'y ni usa nga panagsumpaki. Ug bisan gisulat Kini sa daghang, daghang, daghang mga tawo; ug gatusan, ug gatusan, ug gatusan ka mga tuig ang gintang, nga wala nanghibalo sa usa ka bahin. . . May usa nga mao'y nagsulat Niini *dinhi*, ug may usa nga mao'y nagsulat Niini *dinhi*, ug may usa pud nga mao'y nagsulat Niini *dinhi*. Pero sa dihang gihiusa na Kining tanan, naporma Kini nga Biblia sa Dios. Ug wala gyu'y usa nga nagasumpaki sa usa pa, ug, wala gyud, bisan ang matematika, ni ang hiyograpiya. Ang tanang uban pa sa Biblia, ang tanan-tanan, bisan ang mga numero, ang tanan hingpit gayud nga nagakatakdo. Kon dili kana dinihogan, ambot lang, kung unsa kaha ang matawag ninyo nga dinihogan? Malipayon kaayo ako tungod niining mapanalanginong, karaang Biblia.

16 Adunay miingon, “Usa ka ba ka Katoliko? Protestante?”

Ingon ko, “Wala ni usa niana. Ang Biblia mismo ang akong ginatooan.” Tinuod. Nagatoo ako sa Biblia, ug malipayon ako nga aduna pa gihapon kita'y kagawasan para iwali Kini dinhi niini nga nasud. Oh, pagkaanindot Niini.

17 Karon magatuon kita gikan Niini. Ug karon moabli kita sa Basahon sa Mga Hebreohanon ug magsugod ta sa ika-3 nga kapitulo. Ug mihunong man ta sa ika-15 nga bersekulo. Ug karon inyong. . .

18 Aduna ko'y nakita nga nakamatikod, kaganina, sa dihang gisul-ob ko ang akong antipara nga pangbasa. Dili tungod nga nadaut na ang akong mga mata, kondili milagpas na man gud ko og kuwarenta anyos. Hinoon makabasa man ko niini, *dinhi*, nga normal lang, pero mas makabasa gyud ko niini kon gamit ang antipara. Ug gihimoan ko nila og usa ka pares sa antipara nga pangbasa nga gusto nakong gamiton, tungod kay makabasa man ko niini nga mas maayo ug mas paspas. Ug mao kana'y hinungdan nga nagagamit ko niini. Karon diha sa. . .

19 Una, buut natong hisgotan sa ang diyutay'ng basihanang, tungod basin man gud dunay pipila ka mga bag-ohan ang ania uban kanato, nga wala nakasunod sa unang bahin sa Basahon sa Mga Hebreohanon.

20 Ikaw ba si Mrs. Cox, kining nagalingkod dinhi sa may tumoy? Bueno, nalipay gayud ko nga makita siya. Sa dili pa ako magsugod, magtestimonyo sa ko mahitungod sa grasya sa Dios. Ania ang usa ka babaye nga may kanser kaniadto nga miut-ot sa iyang nawong. Siya mao ang inahan ni Igsoong babayeng Wood. Ug atua ako niadto sa Michigan kauban sila ni Gene ug Leo, ug uban pa, nga nagarekord. Ug sa pagpauli na namo, gitawgan ko sa akong asawa, o gitawgan ko siya. Ingon siya, “Mag-ampo ka sa gilayon para sa usa ka Mrs. Cox, ang inahan ni Mrs.

Wood, tungod kay ginaut-ot na sa kanser ang iyang nawong.” Mikuyanap na kadto sa kilid sa mata ug hangtud sa bukog, sa kilid sa iyang nawong, ug padayon kadto nga mikuyanap. Adunay sa kung unsa nga gibuhathang usa ka doktor bahind niadto, pero samot lang kadtong migrabe, ug mikuyanap pa gyud hinoon; duna man gud siya og usa ka matang sa tambal ang gidapat niadto.

²¹ Ug ilang gidala siya gikan sa Campbellsville, Kentucky, paingon sa...o, mora’g sa, Acton, Kentucky, hangtud sa—sa Louisville, para matambalan.

²² Ug busa si Mrs. Wood, kadto ang unang higayon nga nakita ko siya nga naguol gayud. Tungod, siyempre, iya—iya—iya man kadtong mama, ug mao nga mibati gyud siya og kaguol. Misulod ko sa lawak ug nag-ampo para sa iyang inahan, nga may pagsalig sa gisulti sa Dios nga Siya magatubag sa pag-ampo. Ug pila ka adlaw human niadto, nakagawas na ang iyang inahan. Ug nagalingkod na gani siya dinha karon. Tungod gyud sa makahibulongang grasya, ang Iyang gibuhathang para kaniya.

²³ Mahimo ba nga motindog ka? Dili ko unta gusto nga—nga—nga ipakita ka...Asa, asa gani makita kadtong kanser? Sa—sa may kilid sa nawong, kita n’yo dinha, diha *niana* nga bahin sa iyang nawong, paubos *dinhi*, paingon sa iyang bukog sa aping, og palibot sa iyang mata. Ug giayo gyud siya sa Dios. Dili ba Siya kahibulongan?

²⁴ Pila man ang ania niadtong miaging Domingo nga nakasaksi sa gibuhathang Ginoo pinaagi sa usa ka panan-awon? Ang lalaki, nga baldado na ug buta, ania siya mismo niadto nga naka-wheel chair. Ug nasakitan gyud ko sa dihang miingon kadtong tigulang nga lalaki nga ania pud karon, “Igsoong Branham...” Nagatoo ko nga siya kining igsoong lalaki nga ania karon. Miingon, “Buhata usab kana para sa akong asawa.” Aduna diay siya’y asawa nga baldado sàb. Natunaw gyud ang akong kasingkasing. Gusto ko unta...Buhaton ko ang bisan unsa man dinhi sa kalibutan kung mahimo pa lang, pero dili man kini...wala kini sa akong kagahum. Hinoon anaa man sa akong kagahum ug sa inyong kagahum, ang mag-ampo nga buhaton kana sa Dios. Baldado na ang iyang asawa, paralisado ang kamot, paralisado pud ang tiil, ingon niana. Ug kining maong lalaki mas grabe pa gani kaysa maong babaye, tungod kay makatindog pa man ang babaye ug makalakaw diyutay, pero kining lalaki dili na gyud makahimo niana. Ug ang lalaki... Sa utok niya, nawala na man gud ang pinaka-ugat nga para sa panghinimbang. Ang mga taga Mayos, og daghang uban pa, misurender na gani sa iyaha. Ug may usa ka Katoliko ang nagpaanhi sa iyaha dinhi, usa ka Katoliko nga doktor; ug ang anak niyang lalaki usa ka pari didto sa Saint Meinrad sa Jasper, Indiana. Ug pagpahamutang ra diay kadto og pundasyon alang sa rebaybal nga umalabot, didtong dapita.

²⁵ Ug sa dihang mitindog na ang maong lalaki, ingon siya, “Pero dili pa man ko makakita...” Nagtan-aw tan-aw siya, og miingon, “Oo, makakita na ako.” Abi niya og dili pa siya makakita, kabalo mo. Ug mihangad siya, ug nahitabo nga sa pagyahat niya sa iyang ulo, makalakaw na siya ug makakita na; milakaw siya dinha sa pasilyo, nga siya ra mismo. Ug mga Presbyterian sila. Orthodox siya. Ug kon hisgotan... Kon sa hunahuna n’yo nga ang Pentecostal o mga Holiness lang ang mahimong mosinggit; nan sayup kamo. Siguradong mahimo sàb nila nga mosinggit pag makasaksi sila og ingon niana nga panghitabo; naggakus sila sa usa’g usa ug nagasinggit. Milakaw siya pagawas ug minaug sa hagdanan, nga gitulod na lang ang iyang wheel chair; nagalakaw, bisan nawala na kadtong ugat sa iyang ulo nga para sa panghinimbang. Palandunga n’yo kana. Makalakaw na nga sama kaninyo o kanako. Oh, kahibulongan gyud Siya.

²⁶ Bueno, si Pablo man ang misulat sa Basahon sa Mga Hebreohanon. Ug sa niini nga sulat para sa Mga Hebreohanon, gisulat niya Kini. Ug sa wala pa niya gisulat kini nga mga Basahon, nahibaloon nato... Karon, atong paga... Usa man kini ka leksyon pang-Sunday school, ug mao nga paningkamotan kong magbantay para dili tà magdugay og ayo. Ug pagkahuman magkaaduna pa kita og mga panerbisyo, para ipadayon ang mga niini unyang gabii, kon itugot sa Ginoo. Karon, diha sa Basahon sa Mga Hebreohanon ug sa tanang uban pa nga mga Sulat ni Pablo...

²⁷ Si kinsa ba si Pablo? Usa siya ka malig-on nga Hebreohanon, usa ka eskolar, ug usa ka bantugan nga magtutudlo sa Daang Tugon. Ug gikatudloan siya sa usa sa mga pinakamaayo nga kalalaken-an sa iyang panahon kaniadto. Aduna ba’y makasulti sa ako kung unsay ngalan sa maong lalaki. Si Gamaliel, nga usa sa mga pinakabantugan nga magtutudlo sa iyang panahon. Ug atua si Pablo kaniadto sa tiilan ni Gamaliel.

²⁸ Aduna gyu’y sa kung unsang butang mahitungod sa... kung asa ka nagatambong, kung asa nga simbahan ka nagatambong, ug kung kinsa nga magtutudlo ang nagatudlo kanimo. Nasayod ba mo niana? May—may sa kung unsang butang bahin niini. Busa kinahanglan natong pangitaon ang pinakamaayo nga atong mapangita, aron nga madawat pud nato ang pinakamaayo; dili tungod kay kini pagkamahuguyon ug unsa pa man, kondili tinuod gyud nga pagtudlo sa Biblia.

²⁹ Ania, usa ka higayon kaniadtong nahidangat ang Israel ngadto sa kamingawan kauban ang ilang kasundalohan, ug pito ka adlaw na silang nagapanaw, ug nahutdan na sila og tubig. Ug hapit na silang mangamatay, miingon sila, “Oh, kung aduna lang unta og propeta nga haduol!”

³⁰ Ug miingon ang usa kanila, “Aduna man kita dinhi, si Eliseo.

Siya ang nagabubo og tubig sa mga kamot ni Elias.” Kita n’yo na ang iyang mga kauban? Sa laing pagkasulti, “Ania man si Eliseo nga kauban ni Elias. Anaa kaniya ang Pulong sa Ginoo.” Nasabtan n’yo ba? Natudloan siya sa husto. Ug ingon pa siya, “Ania man siya. Moadto kita ug mokonsulta kaniya, tungod kay ang iyang magtutudlo mao man si Elias, ug anaa kaniya ang pagtulon-an ni Elias.” Kita n’yo na kung unsa ang kalahian? Oo. Mao nga gusto gyud natong matudloan.

³¹ Busa, nabatonan pud ni Pablo ang pagtudlo ni Gamaliel. Ug si Gamaliel kadtong bantugan nga tawo nga mao’y nagpili, ingon nga siya usa mismo ka eskolar, kaniadtong misugod kining kasamok sa nahaunang iglesia, miingon siya, “Ayaw nato kana pagdapatan og mga kamot, mga igsoon. Kung dili kana iya sa Dios, moadto ra gihapon kana ngadto sa walay kapuslanan, bisan pa man. Apan kung iya kana sa Dios, ug atong batokan kana, nan makaplagan nato ang atong mga kaugalingon nga nagabatok sa Dios.” Kita n’yo, aduna siya’y maayo nga pagtudlo.

³² Nabansay si Pablo ilalum niini nga tawo, ug nasayod siya nga usa pud ka maayo nga magtutudlo si Pablo. Ug, usa niadto ka adlaw, bisan matinud-anon siya sa iyang kasingkasing, pero ginalutos niya ang Iglesia, og miadto didto aron ipadakop unta sila.

³³ Karon maghisgot kita og usa pa ka diyutay’ng bahin mahitungod kang Pablo, samtang nagakuha ta sa atong basihanan.

³⁴ Kaniadtong nahulog si Judas, tungod sa kalapasan, tungod sa gugma sa salapi ug sa garbo sa kinabuhi, nahulog siya gikan sa grasya ug mipaingon sa iyang dapit. Ug miingon ang mga tinunan, “Kinahanglan gayud nga napulo’g-duha.” Ug ang iglesia, uban ang tibuok dignidad niini, aron ipakita kaninyo kung unsa ang iglesia; uban ang tibuok dignidad niini ug tibuok gahum niini, kini’y sa gihapon minilyon ka milya nga nakabsan, bisan sa pinakamaayo na nga kahimtang niini. Miingon sila, “Kinahanglan na kitang mangita, og usa sa atong taliwala, nga mao’y mopuli.” Ug napili nila, pinaagi sa pagripa, si Matias. Mateas, man siguro, o Matias. Si Matias, nagatoo ko nga siya gayud. Ug sa dihang napili na nila siya ug giapil siya sa napulo’g-duha, sa napulo’g-usa, nga mao’y mikumpleto sa napulo’g-duha, wala man siya’y bisan unsa nga nabuhat. Ngani kadto lang man ang higayon nga nahisgotan ang iyang ngalan diha sa mga Kasulatan. Kadto mao ang iglesia nga nagahimo og pagpili.

³⁵ Bueno, gihunahuna nila, “Usa siya ka buutang lalaki.” Walay pagduhaduha. “Usa siya ka talagsaon nga lalaki. Usa siya ka eskolar. Siya’y maantigo. Siya’y edukado. Usa siya ka talagsaon nga tawo. Siya gyud ang angay’ng mopuli kang Judas ug mahimong usa sa ato.”

³⁶ Pero, abi ninyo, usahay nagahimo ang Dios og usa ka . . . kon sa atong opinyon, pipila sa pinaka-hinangal nga pagpili. Bueno, ang nakita man gud sa Dios mao kadtong usa ka gamay'ng Judio nga mora'g sungo sa agila ang ilong, og ingon gayud siya ka masuk-anon, nga nagayawyaw ang baba, "Moadto ako didto, og ipadakop ko ang matag usa kanila. Akong—akong ibalhog sila sa bilangoan. Buhaton ko ang *ingon-ani*." Ingon niadto ang gipili sa Dios.

Ang uban pa kanila nagpili og usa ka eskolar ug usa ka diplomata. Ingon niana ang mga ginapili sa iglesia.

³⁷ Kita n'yo, wala man kamo makaila kung kinsa kanang anaa sa altar. Wala man kamo makaila kung kinsa kanang inyong ginatestimonyohan, sulod sa bilangoan o kon asa man. Tingali'g mora kana og boksingero ang hitsura, nga daut ang iyang mga dalunggan, may uwat ang mga mata, ug, wala gyud kamo makaila kung kinsa kana. Pero buhata lang ang angay n'yong buhaton, kana lang, ihatag kaniya ang Pulong. Ang Dios man ang nagapili.

³⁸ Ug napili sa Dios kadtong gamay'ng Judio nga masuk-anon kaayo, o gipili siya, diay. Sa iyang pagpaingon na didto, "Moadto ako ug ipadakop sila. Akong—akong ipakita kanila kung unsa ang puede kong buhaton," ug gitumba gayud siya sa Dios.

Miingon ang Dios, "Mao kana ang Akong gipili, kana mismo."

³⁹ Dili ba hinangal kana, para sa iglesia? "Aba, ginalutos man niya ang iglesia. Usa siya ka karnal nga tawo." Apan ang Dios man ang nasayod kung unsa ang anaa sa kinasuloran sa tawo. Nasabtan n'yo ba ang buut kong ipasabot?

⁴⁰ Bueno, nagkaaduna og kasinatian si Pablo. Pila man ang nagatoo nga ang kasinatian nagaabot pinaagi og pagkakabig? Oo. Kung dili, nan basin duhaduhaan gyud nako ang maong pagkakabig. Ang pagkakabig nagadala man og kasinatian. Ug mao nga dili n'yo kini puedeng ihilambigit sa unsa mang butang. Tungod nga usahay mahimong pagsinggit man kini. Usahay mahimong pagsulti kini og laing mga pinulongan. Usahay mamahimo pud nga paghilak kini. Usahay mamahimong pagtuaw kini. Wala kamo masayod kung unsa gyud kini, busa ayaw sulaying ihilambigit kini sa ingon-niana. Tungod kay, ang matag usa kaninyo napamatud-an na man nga sayup niini, kamong mga Methodist, ug kamong mga Baptist, ug kamong mga Nazarene, ug mga Pentecostal.

⁴¹ Nakakita na man ko og mga tawo nga nanagsinggit sa ingon ka kusog nga mahimo nila, pero kawaton nila ang bulawan sa imong ngipon, kung mahimo. Oo, sir. Nakakita na pud ko og mga tawo nga nagasulti og laing mga pinulongan nga mora'g nagabubo og gisantes sa uga nga panit sa baka, pero—pero sa tinuod lang, nagamama sila og tabako sa may kilid sa ilang baba,

ug mahimo gani nilang luglogon ang imong liog kung mahimo. Tinuod kana. Busa ang ingon-anang mga butang walay . . . Walay ebidensiya para mapamatud-an mo kana, gawas lamang sa kinabuhi nga ginakinabuhi sa tawo. “Pinaagi sa ilang bunga, maila ninyo sila.”

⁴² Busa, anaa ra kana tanan sa Dios. Siya man ang nagapili. Siya ang nagahan-ay sa mga butang, ug ingon niana kana. Busa kung nagatakdo ang inyong kinabuhi sa mga bunga sa Biblia, nan aduna kamo’y maayong panghunahuna. Kung nagapamatuod ang inyong espiritu sa Iyang Espiritu, nga kamo’y mga anak nga lalaki ug mga anak nga babaye sa Dios, nan kamo’y . . . Ang tanang dugay na nga pagkadautan nangawagtang na, ug ang tanang butang nangabag-o na, ug nagakinabuhi na kamo sa gugma, ug aduna na kamo’y pakigdait, ug grasya, ug uban pa, kung ingon niana kamo’y haduol na kaayo sa Gingharian. Tungod kay, ginapamunga na man sa Kinabuhi nga anaa sa sulod ninyo ang ingon-ana nga matang sa pagkinabuhi. Kita n’yo?

⁴³ Kung moingon mo, “Oh, alleluyah, nakasulti man ako og laing mga pinulongan. Alleluyah!” Wala kana nagkahulogan ni unsa man. Wala kana nagkahulogan bisan gamay sama ra kung moanhi ka dinhi ug magtugtog og usa ka awit sa gitara o unsa man. Wala kana nagkahulogan ni usa ka butang. Bisan pa’g nakasulti kamo og laing mga pinulongan, bisan pa’g nakasinggit kamo, ug nagdagan-dagan sa pasilyo, ug mihilak nga mora’g nagpanit mo og sibuyas, wala kana nagkahulogan ni unsa man, wala gayud, gawas kon ang adlaw-adlaw n’yong pagkinabuhi nagapanghimatuod gayud, og nagapabilin Niini.

⁴⁴ Karon, kung ginabuhat n’yo ang ingon-anang mga butang, og dugang niana kana nga pagkinabuhi, “amen,” niana, maayo kana. Maayo gyud kana. Apan mabuhat n’yo man ang ingon-anang mga butang nga wala ang ingon niana nga kinabuhi.

⁴⁵ Busa, dili ang pagsinggit, dili ang ingon nianang butang ang ebidensiya. Miingon si Jesus, “Pinaagi sa ilang bunga, maila ninyo sila.” Ug ang bunga sa Espiritu dili man ang pagsulti og laing mga pinulongan. Dili kana ang bunga sa Espiritu. Ang pagsinggit dili kana bunga sa Espiritu. Ang paghilak dili pud kana bunga sa Espiritu. Kondili, gugma, kalipay, pakigdait, pagkamapuanguron, pagkamaayo, pagkamalulot, pagtoo, kaaghop, og pagpugong sa kaugalingon, mao kana ang mga bunga sa Espiritu. Kita n’yo? Ingon niana ang mga bunga sa Espiritu. Oo.

⁴⁶ Karon, ang hinungdan nga aduna kita og ingon niining mga butang, gusto man gud nilang maghimo og mga organisasyon, nakita n’yo. “Bueno, magkaaduna kita niana. Dalagyon ang Dios, ang tanang nagatoo nga sama sa *among* ginatoohan, mopaingon kita sa *niini* nga direksyon. Ang tanang nagatoo nga

sama sa *amoa*, mopaingon kita sa *niini* nga direksyon.” Apan ang gusto sa Dios nga ang tanan mopaingon sa *Niini* nga direksyon, pataas.

⁴⁷ Bueno, si Pablo, human nga nagkaaduna siya niini nga kasinatian, nahunahuna niya dayon nga usa kadto ka kahibulongan nga kasinatian. Bueno, daw sa unsa . . . Atong—atong—atong hisgotan úsa sa makadiyut ang maong kasinatian. Nagpaingon si Pablo kaniadto sa Damascus, aron ipadakop ang pipila ka tawo didto, tungod kay mikaylap na man didto ang Ebanghelyo. Ang *Ebanghelyo* nagakahulogan og “ang maayong balita.” Ug busa mikaylap kadto kanila didto, ug daghan nang mga tawo ang nanagpanungha, nga puno sa gugma, ug kalipay, ug nagahigugma kang Ginoong Jesus. Ug mikaylap gyud Kini didtong dapita. Busa, mikuha si Pablo og pipila ka sulat gikan sa labaw’ng sacerdote. Ingon siya, “Moadto ko didto, ug ipadakop ko silang, tanan.”

⁴⁸ Busa nagdala siya og gamay’ng grupo sa mga tigbantay, mga tigbantay sa templo, mga sundalo, sa iyang pagpaingon didto. Samtang nagabiyahé sila sa dalan, ug siya nga nasayod na gayud sa iyang pagabuhaton, sa kalit lang, adunay nahitabo. Sa kalit lang, adunay usa ka dakung Kahayag sa iyang atubangan, dakung Kahayag. Bueno, midan-ag Kadto nga sama sa adlaw. Usa kadto ka talagsaong butang nga nahitabo. Midan-ag gayud ang Kahayag nga tungod niadto siya, ang iyang mga mata nabuta na, halos. Ug natumba siya sa yuta. Ug siya—nagbuy-od siya didto sa yuta, ug mihangad siya.

⁴⁹ Tingali’g dunay napulo o kinse ka lalaki ang kauban niya kaniadto. Pero aduna ba’y si kinsa man niadto nga mga lalaki ang nakakita niadtong Kahayag? Wala, sir. Si Pablo ra ang nakakita Niadto. Tungod wala man gud sila gikatagana nga makakita Niadto. Busa, mahimo gyud nga may pipila ka tawo ang makakita og mga butang, samtang, ang uban dili makakita. Kita n’yo? Bueno, si Pablo ra man ang nakakita niadto nga Kahayag, nga tungod Niadto nabuta gani siya. Dili siya makakita, sulod sa pipila ka adlaw, ingon gayud Kadto ka tinuod para kaniya. Ug dili siya makakita sulod sa pipila . . .

Pagkahuman niadto, sa diha nga nagasulat na siya og mga sulat, nahasol gyud siya og ayo gumikan sa iyang mga mata, mao nga dagku kaayo ang mga letra sa iyang pagsulat. Ingon siya, “Nakita man ninyo nga dagkung mga letra ang pagsulat ko kaninyo.” Dili man siya halos makakita.

⁵⁰ Atua siya niadto sulod sa bilanggoan, ug nangamuyo siya sa Ginoo nga ayohon siya niadto nga problema. Ug nangamuyo siya Kaniya sa makatulo ka higayon. Apan unsa ma’y gisulti sa Ginoo? “Ang Akong grasya igo alang kanimo, Pablo.”

⁵¹ Miingon si Pablo, “Kung ingon-niana magahimaya ako sa akong mga kaluyahon.” Mao nga, miingon siya, “Aron ako

dili makapasulabi sa pagkahimuot tungod sa kadaghan sa Pinadayag kanako, gihatagan ako og usa ka sinugo sa yawa, usa ka tunok sa lawas, nga nagasagpa kanako.” Moarang-arang man siya sa hamubo nga panahon, ug pagkahuman mograbe na usab.

Ang *sagpa* nagakahulogan og “sunod-sunod nga paghampak.” Sama sa sakayan sa dagat, kabalo na mo, ginahampak kini sa mga balod, kita n’yo, sunod-sunod nga paghampak.

Ug siya’y, moarang-arang man siya, ug pagkahuman atakihon na usab; dayon moarang-arang, og atakihon na usab. Ingon siya, “Ginoo, unsa ma’y nahitabo, dili Mo ba kini wagtangon kanako?”

⁵² Ang ingon Niya, “Ang Akong grasya igo alang kanimo, Pablo. Padayon lang.” Nagpadayon kadto nga . . .

⁵³ Ingon siya, “Karon, kung—kung walay problema kanako, ug ang tanan-tanan hingpit,” miingon, “kung ingon-niana sa akong pagpadayon, oh, basin mahimo akong mapasigarbohon ug moingon, ‘Nakita n’yo, wala gyud ko’y problema. Ginaampingan ako sa Ginoo, igsoon. Alleluyah!’” Kung ingon-ana mangandak ka sa imong kinaugalingong-pagkamatarung.

⁵⁴ Mao nga kinahanglan kang hatagan sa Dios og usa ka gamay’ng problema, usahay, aron medyo ipaubos ka, kabalo mo. Tinuod kana. Aron ipaamgo kanimo nga Siya mao ang Agalon. Oh, dili ba Siya kahibulongan? Oo, sir, mahimayaon gayud!

⁵⁵ Busa siya, si Pablo, niadtong tungora, aba, human nga nagkaaduna siya niining mahimayaon nga kasinatian . . .

⁵⁶ Karon, kung uban pa kadto sa karong panahon, moingon siguro sila, “Oh, dalaygon ang Dios, alleluyah. Grabe, aduna gyu’y gibuhay ang Ginoo kanako! Himaya sa Dios!” Pero dili ingon-ana si Pablo; siya’y usa man ka makinaadmanon sa Biblia.

⁵⁷ Kadto nga kasinatian kinahanglan nga motakdo gyud sa Pulong sa Dios. Oo, sir. Kung dili kadto bug-os nga mitakdo sa Biblia . . . Dili nga motan-aw lang *dinhi*, og moingon, “Oh, bitaw, ania na gyud kini. Dalaygon ang Dios, naangkon ko Kini.” Huhuh. Dili ingon niana ang paghatag sa Dios Niini.

⁵⁸ Kinahanglan nga tibuk Biblia gyud kini, ang tanan Niini. Tungod, mahimo mo man . . . Ngani ginagamit man sa mga dili-magtotoo kini nga Biblia ingon nga basihan sa ilang debate. Pero igo ra lagi silang mokuha og diyutay’ng Kasulatan *dinhi*, mopakli dinhi ug mokuha na pud og diyutay *dinhi*, og paningkamotan na nga itakdo ang mga niini, ug bisan bug-os kini nga duha ka managlahi nga, hilisgotanan. Mao nga, kinahanglan n’yo gayu’ng itakdo ang Kasulatan sa Kasulatan.

⁵⁹ Maingon sa gisulti ni Isaias, sa ika-28 nga kapitulo, “Kinahanglan nga lagda ibabaw sa lagda, lagda ibabaw sa lagda; dinhi madiyutay, didto madiyutay.” “Kupti ninyo kung

unsa ang maayo.” Kita n’yo, sa ingon-aning paagi Kini nagaabot: lagda ibabaw sa lagda ibabaw sa lagda, Pulong sa Pulong, Kasulatan sa Kasulatan. Kining tanan kinahanglan magatakdo gayud sa usa’g usa. Mao kana kon nganong, nagatoo ko, nga kining mga leksyon nga sama sa atong ginatun-an karon, usa gyud kini ka mahimayaong butang para sa iglesia, tungod kay ginapakita niini ngadto kanila nga ang tanang Kasulatan nagakatakdo gyud sa usa’g usa. Ug ang atong kasinatian kinahanglan motakdo sàb sa Kasulatan. Oh, ania kini! Kung dili gani takdo, nan sayup kini.

⁶⁰ Ug ngani nagkinabuhi ako sulod sa daghang mga tuig, nga wala pa nanghibalo kung unsa kadtong Kahayag nga miigo kang Pablo og nagpatumba kaniya. Sa dihang, ang kalibutan, ang mga Kasulatan. . . May mga tawo, og mga magwawali nga nagsulti kanako, “Iya kana sa yawa. Aba, mamahimo ka gayu’ng usa ka manghihimalad. Mamahimo kang usa ka espiritista. Ayaw pagpatonto Niana, Billy. Aduna gyu’y sayup Niana. Ayaw kana buhata, dong. Sayup kana. Ang yawa kana. Bueno, dong, mamahimo ka lang nga usa ka ordinaryong espiritista. Mamahimo kang usa ka espiritista kung buhaton mo kana. Oh, kanang tanan iya gyud sa yawa. Kana’y—dili kana husto.” Apan sa dihang. . . dili ko pa gusto nga iwali kini kaniadto.

⁶¹ Ug sa pagpaingon niya didto sa Damascus, dili man pud gusto ni Pablo nga iwali kini kaniadto, hangtud nga masayran niya kon husto ba gyud kini o dili. Busa miadto siya sa Arabia sulod sa tulo ka tuig, ug gitun-an ang Kasulatan. Ah! Sa pagbalik na niya, miingon siya, “Karon sige tay-oga n’yo kini pagawas kanako.”

⁶² Nasayod siya kaniadto nga kinahanglan atubangon niya ang mga Fariseo. Kinahanglan atubangon niya ang mga Saduceo. Kinahanglan niyang atubangon ang kalibutan, ug ang kalibutan sa Gentil. Ug mao nga si Pablo, gisulat niya kini nga Biblia, kining Basahon sa Mga Hebreohanon, gisulat kini alang niadto nga katuyoan. Gitay-og niya ang mga Hebreohanon, ug gigamit niya ang Daang Tugon ug gipakita Kini dinhi sa Bag-ong Tugon. “Kini mao ang Dios,” ingon siya, “ania Kini, sa—sa tanang mga propeta ug sa tanan-tanan.” Misugod siya dinha sa sinugdanan, sa unang kapitulo nga ato nang nahisgotan, “Kay ang Dios sa nagkalainlaing mga panahon, sa kaniadtong karaang panahon, sa nagkalainlaing mga pamaagi, nagpakigsulti sa atong mga ginikanan pinaagi sa mga propeta.” Sa ingon-anang paagi gipadala sa Dios ang Iyang mensahe, nga gipamatud-an pinaagi sa Urim Thummim. “Apan sa niini nga adlaw nagpakigsulti Siya kanato pinaagi na sa Iyang Anak, nga si Cristo Jesus,” nga gipamatud-an pinaagi sa Iyang Biblia. Mao kana.

⁶³ Busa kining mga kasinatian nga ginaingon sa kalibutan, “Oh, panghunahuna lang kana. Aba, walay. . .” Sa dihang nagpakita kaniadto ang Manulonda, kadtong Kahayag didto sa

may suba, sa dihang giwali ko ang akong unang rebaybal dinhi sa may kanto, among gibautismohan ang tanan niadto nga mga tawo. . . nagatoo ko, Igsoong Fleeman, nga atua ka sa . . . ambot lang kung ania ka ba niadtong higayona o wala. Pila man ang ania kaniadtong—kaniadtong nagpakita ang Kahayag didto sa suba? Aduna ba’y mga karaan na dinhi? Oo, may pipila kanila. Sa dihang nagpakita Kini, didto sa may suba.

⁶⁴ Ug miingon sila, “Pagmata-mata lang man kadto.” Pero daghan baya sa ato ang nanagtindog, nga nagatan-aw Niadto, ug mipaubos pa gani Kadto. Ug pila ka tuig human niadto, gipamatud-an na sàb Kini sa Dios pinaagi sa mekanikal nga mata sa kamera. Tinuod gyud kini.

⁶⁵ “Bueno, usa ba kini—kini ka tinumotumo lang, usa ba kini ka butang nga—nga. . .?” Dili sir. Ginakuha nato kini mismo dinhi sa Biblia ug ginapakita kaninyo. Kini ang mao mismo nga Ginoong Jesus. Mao sa gihapon nga butang ang Iyang ginabuhat. Mao sa gihapon ang Iyang buhat. Mao sa gihapon ang Iyang gahum.

⁶⁶ Matikdi n’yo, niadtong miaging Dominggo, dinhi. Didto, samtang nagahigda ako sa higdaanan, wala ko pa nakita sukad-sukad ang maong lalaki sa tibuok kong kinabuhi. May mitungha ug miingon, “Adunay usa ka lalaki sa tabernakulo, ug ubanon na siya, itum ang buhok, nga giuban na. Buta siya, ug dili siya makalakaw. Naglingkod na lang siya sa usa ka wheel chair. Gipaanhì siya sa usa ka lalaki nga itum ang buhok; usa ka doktor, Dr. Ackerman, usa ka lalaki nga itum ang buhok, Katoliko nga lalaki. Gipaanhì ang usa ka lalaki, og molingkod mismo *dinha*. Ug MAO KINI ANG GINAINGON SA GINOO,” nakatindog na siya, nakalakaw na pagawas og nakakita na ug ang tanan okey na. Unsa man ang nagbuhat niadto? Ania ang mao ra nga Manulonda. Ang Mao ra mismo nga miigo kang Pablo kaniadto, didto sa dalan paingon sa Damascus, ang nagapuyo sa Iyang Iglesia ug sa Iyang katawohan karong panahona. Kini’y Kasulatan nga nagatakdo sa Kasulatan. Kinahanglan nga ingon niana gayud.

Oh, aduna kita og *mga dagaang*. Moabot ra kita dinha, pagkataudtaud.

⁶⁷ Oh, aduna kita’y halawom nga butang sa atong atubangan, kung mahisgotan lang nato kini, karon ug unyang gabii. Karon hinay-hinay na tâng nagapaingon sa halawom nga mga tubig. Diin inyong. . .

⁶⁸ Kabalo mo, niadtong bata pa ako, aduna kaniadto og gamay’ng lim-aw sa luyo sa among balay, ug nagaadto ako didto. Ug kaming tanan nga mga gagmay’ng bata manglusbog didto, nga hubo; gagmay pa, mga sais, siete anyos ang panuigon. Ug among. . . Ang tubig mga *ingon-ani* ra kalawom. Pareha ra kadto sa lunangan sa baboy. Ug aduna ako didto’y usa ka

kahon nga akong mapatongan. Gusto ko kaniadtong ipakita nga makasalom ako sa tubig; pisliton ang akong ilong, ug magkasaw-kasaw, nga nakaingon *niana*. Ug moigo gud sa lapok ang gamay kong tiyan, kabalo mo, ug manglagsik mismo ang lapok sa bisan asa. Gisultihan ko man gud ang akong papa nga makalangoy na ko.

⁶⁹ Mao nga iya akong gidala didto usa ka adlaw. Ingon siya, “Gusto tà kang makita nga molangoy.” Milukso ko didto, kabalo mo; gihubo ko ang akong sinina, didto sa may kalibonan; ug midagan, og misalom sa tubig. Nagakasaw-kasaw ako, og nanglagsik gud ang lapok sa bisan asa. Ug nagalingkod ra si Papa didto ibabaw sa imburnal. Milingkod siya didto ug gitanaaw ako sa pipila ka gutlo. Miingon, “Haw-as na dinha nianang lim-aw, ug kaligo na, ug manguli na tà.” Kita n’yo?

⁷⁰ Bueno, ingon niana usab, ang pipila sa ato nga ginatawag ang mga kaugalingon nga mga Cristohanon. Nagakamang kita sa lapok. Tinuod kana. Basta nagapabilin pa gani kamong, “Usa ako ka Methodist. Usa ako ka Pentecostal. Usa ako ka Presbyterian. Aduna ako’y kapanghimatuoran; naangkon ko na Kini.” Nagakamang ra kamo sa lapok.

⁷¹ Usa niadto ka adlaw kauban ko ang akong uyoan. Sige ko siyang giingnan... Siya’y mga kinse, dise-sais anyos ang panuigon kaniadto. Atua kami sa suba. Ingon ko, “Tiyo Lark, kabalo baya ko molangoy.” Ug nagalingkod ko niadto sa may luyo sa sakayan, kabalo mo, nga maayo ug hilwas ra ang pamati. Pero sa gikuha na niya ang bugsay ug gituklod ako, didto sa mga napulo ka piye ang kalawmon sa tubig. Lahi ra gyud diay; ang tanan nang pagkasaw-kasaw, pagsinggit-singgit, nga wala n’yo pa nadungog sukad-sukad sa inyong kinabuhi.

⁷² Sa umaabot nga adlaw kon ituklod man ka, kinahanglan nga nasayod gyud ka kung asa ka nagabarug. Oo, sir. Kung nakaila ka Kaniya, imong... Kinahanglan nga nakaila gayud ka Kaniya. Tinuod.

Ug karon nagalusbog na kita sa halawom nga tubig, halawom gyud nga tubig, kon diin malumos gyud ka kung ikaw—kung dili ka pinatambok, og ayo nga Cristohanon.

⁷³ Matikdi n’yo ang Pulong. Si Pablo, gihibalo niya una kini. Iyang gibalikan ang Daang Tugon, ug nasayran niya kini. Nakita niya mismo nga kadtong iyang kasinatian, bug-os niya gyud napamatud-an. “Karon unsa ba gyud Kadtong miigo kanako nga nagpatumba kanako?”

⁷⁴ Usa kadto ka Kahayag, dakung Kahayag nga atua didto, nga midan-ag nga sama sa adlaw, nga atua mismo sa iyang atubangan. Miingon Siya, “Saulo, Saulo, nganong ginalutos Mo ako?”

⁷⁵ Ingon niya, “Ginoo, si Kinsa ba Ikaw nga ginalutos ko?”

76 Miingon Siya, “Ako mao si Jesus.”

77 “Abi ko og usa—usa ra Siya ka tawo, nga may uwat sa kamot, nga ilang ginaingon nga nagapakita sa mga panagtigum karon, og nga may mga agi sa lansang diha sa Iyang mga kamot ug sa Iyang ulo.” Dili, dili; dili *ingon-niana* nga lawas, dili *kanang* lawasa. Kita n’yo? Usa na Siya ka Kahayag karon. Si Saulo . . .

78 Sa dihang ania pa si Jesus sa yuta, miingon Siya, “Gikan Ako sa Dios. Mobalik Ako ngadto sa Dios.”

79 Siya man mao ang Manulonda nga nanguna kaniadto sa mga anak sa Israel nga anaa niini nga Kahayag, latas sa kamingawan. Mibalik Siya pag-usab ingon nga mao gihapon nga Kahayag. Ug nasayran Kini ni Pablo, gikan sa Daang Tugon. Siya miingon, “Ako mao si Jesus, ang Manulonda sa Pakigsaad.”

80 Ug nahimo Siyang unod, aron tuboson kita. “Wala Niya gigamit ang porma nga iya sa mga Manulonda,” nasayran nato sa nauna nga mga kapitulo, nga atong gitun-an. “Wala Niya gigamit ang porma nga iya sa mga Manulonda, kondili ang sa Kaliwat ni Abraham,” aron nga maila Siya, aron nga *makita* sa mga tawo ang Dios. Amen.

Bueno miingon Siya, “Mobalik Ako ngadto Niana.”

81 Ug sa dihang nasabtan na Kadto ni Pablo, ingon niya, “Sigurado, Siya kadto. Siya gyud Kadto.”

82 Nagkaaduna pud og kasinatian si Pedro usa niadto ka gabii samtang siya nagaampo. Misulod sa bilding kadtong mao gihapon nga Kahayag, giablihan ang mga pultahan sa iyang atubangan, og nakagawas siya ngadto sa mga kalsada. Ug abi ni Pedro nga nagadamgo ra siya; dinihogan gayud siya. Wala man siya kahibalo kung unsay nahitabo. Ingon siya, “Nakamata na ba ko? Pero ania na man ako sa gawas dinhi sa kalsada.”

83 Ug miadto siya ngadto sa balay ni Juan Marcos. Ug giablihan sa batan-ong babaye ang pultahan, usa ka gamay’ng gining nga atua didto, nga mitambong sa panagtigum sa pag-ampo. Aduna ma’y nanuktok sa pultahan. Mao nga giablihan niya. “Oh,” ingon niya, “ania na si Pedro. Nagaampo kamo nga mapahigawas siya gikan sa bilangoan. Gipahigawas gyud siya Ginoo.”

84 “Oh,” ingon sila, “padayon tà.”

“Oh Ginoo, ipahigawas intawon siya!”

85 “Bueno,” ingon ang babaye, “ania na gani siya nagatindog sa pultahan, nagapanuktok.”

Padayon ra nga nanuktok si Pedro, “Pasudla ko.”

86 “Oh,” ingon ang babaye, “si Pedro lagi kini.” Kaniadto nga mga panahon, aduna pa gihapon sila og niining, usa ka gamay’ng trangka. May gamay’ng tabon kini, nga imong ipataas para makita ang gawas, kita n’yo. Sa dili pa nimo pasudlon ang imong bisita, kinahanglan mo unang hibaloon kung kinsa ang

nagatuktok sa pultahan. Tungod, aduna man kaniadto og mga kawatan; kung ablihan mo dayon ang pultahan, nan patyon gyud ka nila.

⁸⁷ Busa, ilang giablihan ang pultahan. Ingon ang babaye, “Si Pedro gyud lagi.”

⁸⁸ Ingon sila, “Oh! Oh, my, basin patay na siya. Basin iya na lang kanang anghel ang nagatindog dinha. Kita n’yo? Basin og misulod na siya sa iyang gihimaya nga lawas, kabalo mo, kanang theophany.”

⁸⁹ Mahinumduman n’yo ba nga naghisgot kita bahin Niini, bahin niadtong dakung Diyamante, kung unsa nga ginareplektar Niini ang Kahayag, og kung unsa nga mobalik Kini didto? Ang. . . “Kon kining yutan-on nga tabernakulo matun-as man, aduna na kita’y usa nga nagahulat.”

Ug abi man gud nila og patay na si Pedro, nga natun-as na kadtong daan nga lawas, ug ilubong na nila kadto human sa pila ka adlaw, og nga misulod na siya sa iyang anghel, o sa iyang gihi-. . . Dili sa gihimaya nga lawas, kondili sa iyang theophany, sa lawas nga naiandam na. Pero dili kini makalamano sa inyo. Wala man kini’y mga kamot para makalamano, nga ingon niana, apan dagway kini sa tawo. “Miadto didto, ug nanuktok sa pultahan.”

⁹⁰ Ingon ang babaye, “Dili. Si Pedro lagi kini. Siya gyud ang nagatindog dinha.” Giablihan niya ang pultahan ug misulod. Atua siya. Bueno, gipahigawas si Pedro niini nga Kahayag.

⁹¹ Karon, sa mao gihapon kadto nga paagi niadtong nahaunang. . . si Pablo, sa nahaunang Iglesia, nga nakita kadtong Kahayag sa Dios nga midan-ag kang Pablo, ang mao mismong Butang mikunsad man sàb karon. Bueno, makasulti man ang mga tawo og bisan unsa, wala kana nagapasabot nga husto kana. Apan sa dihang pamatud-an sa Dios ang unsa mang butang, ang buhat Niini mao ang magapamatuod Niini. Gani, gipamatud-an Kini sa kamera. Ug ang tanan nga atong. . . nga gibuhay sa Ginoo, bug-os gayud, nga gipamatud-an sa walay-pagkasayup nga paagi nga Kini mao gyud ang Dios, pinaagi sa mga Kasulatan, pinaagi sa pagpamuhat Niini, og pinaagi sa kasinatian. Pero ayaw nilang magpatalinghug.

⁹² Matikdi n’yo kining tabernakulo dinhi. Karon, hinumdumi n’yo, kabalo na mo niini. Wala kita nagatinguha og daghang mga tawo. Wala man pud kita’y igong lugar nga mapahilunaan kanila, bisan pa man. Apan, ania. Ang usa ka panagtigum nga ingon niini, kon diin nanagkatigum kita alang niini, makadani man unta sa Falls Cities. Pero mga patay na man gud sila. Sila’y bug-os gayud nga mga patay na. Hinoon aduna sila’y mga mata, apan dili sila makakita.

Moingon mo, kamo, “Aba, Igsoong Branham, dili ba sila mahimong moadto sa doktor para patambalan ang ilang mga

mata?” Dili man matambalan sa doktro ang ingon niana nga matang sa panan-aw.

⁹³ Miingon si Jesus, “Kung naila ninyo Ako, naila usab unta ninyo ang Akong adlaw.” Ingon pa Siya, “Kamong buta nga mga Fariseo. Makabalo kamong moila sa dagway sa kalangitan, apan sa mga ilhanan sa panahon, dili kamo makaila.”

⁹⁴ Nagalagpas lang ba kini sa inyong ulo? Paminaw mo. Tan-awa n’yo ang mga ilhanan sa atong gikinabuhian karon. Karon, dili lamang kini kung unsang...ako, mismo, yanong tawo ra man ko, dili gani usa ka magwawali, nga sama sa inyong ginaingon. Wala ko’y edukasyon, nga sama sa ginatawag sa kalibutan nga, “usa ka magwawali.” Ug mga kabus lamang kita. Tan-awa n’yo kining bilding nga atong nahimutangan. Tan-awa n’yo ang mga katedral, niining buntaga. Pero matikdi n’yo kung asa ba ang Dios. Kana ang pinakamahinungdanon.

⁹⁵ Mao man usab ang Moab kaniadto sa tanan niyang kaharuhay ug sa iyang kaanyag, samtang atua ang Israel sa mga balongbalong. Pero asa man ang Dios? Ngani aduna didto ang pundok sa mga holly-roller, nga nagabuhat kono og tanan nang sayup. Apan si Balaam, ang ilang-ilang obispo, napakyas nga makita kadtong gibunalan nga Bato, kadtong Tumbaga nga Serpente, kadtong Haligi nga Kalayo. Buta man gud ang iyang mga mata. Dili niya makita Kadto. Ingon niya, “Ginahanduraw lang nila Kana.” Pero atua mismo ang Dios.

⁹⁶ Dalaygon ang Dios, oh, ania mismo Siya! Ania ang Dios, ug ginabuhat Niya ang mao gihapong butang nga Iyang gibuhat kaniadto. Ug Iya gayud...Ginatakdo nato ang Kasulatan sa Kasulatan. Wala gyud sukad gipresentar sa Dios ang Iyang Kaugalingon sa usa ka bantugang tawo, sa yuta, kondili nagapuyo Siya kanunay ipon sa ordinaryo ug mapainubsanon nga mga tawo. Ug ania gani Siya karong buntaga, nga ginabuhat ang mao gihapong butang. Ginapanghimatud-an Kini sa Kasulatan. Ginapanghimatud-an pud Kini sa kamera. Karon, kana, ang hinungdan kon nganong ginapahinungdan ko kana nga retrato, dili tungod kay anaa ako dinha. Ako’y—usa lamang ako ka makasasala, nga naluwas pinaagi sa grasya, sama ra usab kaninyo. Apan ang ginapaningkamotan kong isulti, mao, Iya kining Presensiya nga nagauban kanato. Mao kana ang pinakamahinungdanong butang. Bueno, kung gihimo Niya ako nga—nga si Eliseo nga nagpakatawo, unya kung wala kamo’y pagtoo aron toohan kana, nan dili gyud kini makahatag og unsa man nga kaayohan kaninyo.

“Siya mianhi sa mga Iya, ang mga Iya wala modawat Kaniya.”

⁹⁷ Mao kana’y hinungdan, nga dinhi sa siyudad karon. Aba, mahimo ko nga magsugod og rebaybal dinhi, sa usa ka dakung bilding o unsa man, pero dili mo gayud maaghat ang daghang

mga tawo para motoo niini. Dili man sila motoo. Dili sila makatoo. Tungod nga humana man ang ilang adlaw.

⁹⁸ Kining mao ra mismo nga leksyon, karong buntaga, kon didto kini sa Africa, tingali'g makaaghat kini og napulo ka libo, dili mominus, og napulo ka libo nga mga kalag paingon kang Cristo; diin mahimong may usa ra ka makasasala nga ania dinhi karong buntaga, o kaha, usa ka nag-backslide. Kadaghanan sa ilaha nawalihan na man gud og ayo, hangtud nga wala na gayud. Ingon-ana lang.

⁹⁹ Mao nga ang ginapaningkamotan na lang natong isulti, nga, ang Kasulatan nagatakdo gyud sa Kasulatan. Karon, bisan unsa pa kahalangdon ang maong kasinatian, kon dili kana nagatakdo sa Kasulatan, sayup kana.

Ang Urim Thummim, bisan unsa pa kamaayo sa propeta, kung may gisulti siya ug wala mianinag ang mga kahayag diha sa Urim Thummim, nan sayup kini. Bisan unsa pa ka daw maayo ang maong damgo, kung wala mianinag niini ang Urim Thummim, nan sayup kini.

Kaniadtong natapos na ang pagka-sacerdote, gipahimutang sa Dios ang Iyang Biblia. Miingon si Pablo, “Kung ang usa ka Manulonda nga gikan sa Langit moabot,” Mga Taga-Galacia 1:8, “ug magawali og lain nga maayong balita gawas sa gikawali na kaninyo, ipatunglo siya.”

¹⁰⁰ Miingon kang Juan nga tigpadayag ang Manulonda nga gikan sa Langit, nga mao ang Dios Mismo, “Ako si Jesus ang nagpadala sa Akong manulonda aron sa pagpanghimatuod, o aron sa pagpakita niining mga butanga.” Ingon Niya, “Kung may si bisan kinsa nga magadugang og usa ka pulong ngadto Niini, o magataktak og usa ka Pulong gikan Niini, pagataktakon usab ang iyang bahin, gikan sa Libro sa Kinabuhi.” *Kini* mao na Kana, ang Biblia.

¹⁰¹ Busa, kining mga kasinatian ug kining mga butanga kung magakahitabo kini kanato sa karon, kung wala kini gipanghimatud-an sa Pulong sa Dios, nan sayup kini; dili ko igsapayan kung unsa ma'y mahitabo, sayup gihapon kini. Busa angay gyud nga sumala kini sa Kasulatan, nga bug-os gayud nga Kamatuoran. Oh, malipayon kaayo ko nga miyembro ako sa mahimayaong Lawas ni Cristo.

¹⁰² Bueno, moadto na ta karon, moadto na kita sa leksyon mismo. Bueno, natapos man ta dinhi kon diin miingon siya, “Sanglit ginalibotan man kita . . .” dili diay . . . pasayloa ko. Ang, ika-12 nga kapitulo man diay ang akong gikutlo. Hinoon nabasa ko na kini, pero wala ko pa matun-i kini. Ako . . .

¹⁰³ Si Igsoong Norman, nga naga-estar didto sa akong balay, ug nasayod siya nga bag-ohay lang ako miabot kagahapon, nasayod pud ang mga kaigsoonan, didtong dapita, nga bag-ohay lang ako miabot. Mao nga ang bugtong higayon nga nakabasa ko og

Kasulatan, dinhi na mismo sa paglingkod ko, kaganina. Husto kana. Dili man gyud nako ginatun-an Kini, kondili ginahulat ko lang ang Balaang Espiritu nga ihatag Kini sumala sa gusto Niya. Nasayod man Siya kon asa—asa ang maong tawo, nga kinahanglan modawat Niini. Mao nga kung aduna na ako’y naandam sa akong hunahuna nga akong igasulti, kung ingon-ana mahimo kining sayup. Apan kung pasagdan ko lang Siya nga maoy mamuhat niini, dalhon Niya Kini diritso mismo sa bahin kon diin Kini nahiangay. Kita n’yo? “Ayaw ninyo’g hunahunaa kung unsay inyong igasulti, kay dili man kamo Mao ang magasulti, kondili Ang inyong Amahan nga nagapuyo sa sulod ninyo. Siya ang magasulti.”

¹⁰⁴ Karon, sa ulahing kapitulo, sa naunang kapitulo, nadungog na nato kini, nga, “Unsaon man nato sa paglikay, kung talikdan ta kining dakung kaluwasan; Nga unang giwali kanato ni Ginoong Jesus, ug Iyang gipamatud-an nganhi kanato pinaagi niadtong mga nagpakadungog Kaniya?” Ang mao ra mismong mga butang nga gibuhat ni Jesus kaniadto, aron ipakita, ang mao mismong mga butang nagakahitabo dinhi: ang mao ra nga Manulonda sa Dios, mao ra nga mga buhat, mao ra nga kapanghimatuoran, mao ra tanan-tanan, mao ra gyud mismo, mao ra nga Ebanghelyo, nga takdo mismo sa Pulong. “Kung gitudlo kadto sa Ginoo, dayon gipamatud-an sa Iyang mga tinun-an nga atong nadungog,” si Pablo ingon nga mao ra usab, “unsaon man nato sa paglikay, kung talikdan ta ang ingon ka dakung kaluwasan?”

¹⁰⁵ Bueno, ginasulti kana mismo ni Pablo ngadto sa iyang mga tigpaminaw nga mga Hebreohanon. Kaniadto, wala pa man sila’y mga teyp rekorder, nga sama sa karong panahon, nga anaa kanato dinhi. Apan aduna sila kaniadto og mga escriba nga atua mismo didto, og ginasulat Kini samtang ginawali Kini ni Pablo.

Ug mao gihapon Kini mismo dinhi sa karon. Atong ginarekord Kini pinaagi’g mga teyp rekorder, ug kini nga mga teyp nagakadangat sa tibuok kalibutan, kita n’yo, aron ipakita nga Kini mao ang Kamatuoran. Dili kawang ang atong relihiyon, bug-os gayud Kini nga mao ang nabanhaw nga si Jesus Cristo, mao gayud. Mao nga dili gyud nato angay’ng talikdan Kini.

¹⁰⁶ Karon, dili mo angay’ng basta na lang nga mobiya sa simbahan, karong adlaw, ug moingon, “Bueno, medyo nalipay baya ko sa pagtambong didto. Gusto ko ang panag-awit, ug mahigalaon pud ang mga tawo nga nagatambong niadtong gamay nga simbahan.” Ayaw n’yo buhata ang ingon-ana.

¹⁰⁷ Igsoon, ipadilaab gayud ang inyong kasingkasing, moingon, “Ania, kinahanglan nga aduna gyud ako’y buhaton bahin niini. Kinahanglan kong magsangyaw ug tan-awon kung aduna ba ako’y madala nga tawo para maluwas.”

108 Ug dili nga basta na lang pud magsangyaw, nga moingon, “Dalaygon ang Dios, kung dili kamo maghinulsol, malaglag gyud kamo.” Dili ingon-ana.

Buhata kini ingon nga malumo. “Magmaalamon sama sa bitin, malumo sama sa usa ka salampati.” Kita n’yo, sa ingon-ana gyud nga paagi. Duola n’yo ang tawo, kung nagabuhi siya og mga manok, maghisgot ka úna mahitungod sa mga manok, nganha sa maong tawo, sa makadiyut. Kita n’yo? Ug pagkahuman, mahibaloan mo na lang, nagahisgot na diay kamo mahitungod sa Ginoo. Kung usa man siya ka mag-uuma, paghisgot sà mo mahitungod sa iyang umahan.

109 Kung nagabaligya siya og mga sakyanan, paghisgot sà mo mahitungod sa iyang mga sakyanan, sa makadiyut, “Pagkanindot sa imong mga sakyanan,” ug uban pa. Kita n’yo?

110 Hangtud nga moabot na sa imoha ang Espiritu, pag moingon na ang Amahan, “Karon na ang higayon para maghisgot kaniya mahitungod sa iyang kalag.”

111 Puede pud ninyong sugdan sa ingon niini, kita n’yo, “Nindot gyud kana nga sakyanan. Kabalo ka ang sakyanan, sa karon, nahimo na kining mahinungdanon. Oh, daw sa unsa nga ang mga nasud nahimo nang duol sa usa’g usa; ug ang mga siyudad dinhi sa atong nasud, nahimo na pud nga duol sa usa’g usa. Ang mga kahigalaan ug mga inahan mas makaduaw na gyud sa usa’g usa. Kabalo ka, mahinungdanon gyud nga butang ang makabaton og sakyanan nga sama sa imong ginabaligya.”

112 “Bitaw, sir. Tinuod gyud. Uh-huh.” Kabalo mo, bisan nagapabuhot-buhot pa kana sa iyang sigarilyo, o unsa man. “Oo, ang mga niini, maanindot kini nga mga sakyanan.”

113 “Nahunahuna mo na ba kon unsa kaha ang mahunahuna sa mga karaang tawo kung makakita sila og ingon niini?” Padayon lang sa pagpakig-istorya nga ingon niana, kabalo na mo.

Pagkataudtaud, moingon siya, “Oo, oo, nakahunahuna bitaw ko niana.”

114 “Abi nimo, ang usa pa ka butang nga mahimo niini, mahatud kami niini sa mga ginapahigayon namo, nga sama sa mga rebaybal. Mahimong makatambong pud ang mga tawo sa tibuok nasud, sa ingon ka paspas, ngadto sa usa ka rebaybal.” Kita n’yo, sige-sige mo siyang, ginapaingon dinha, kabalo na mo.

115 Kung Aduna na kamo’y mabati nga nagapahunong sa inyo, nan hunong na kamo dinha mismo, og mobalhin na *dinhi*. Sama sa gisulti sa usa ka doktor, didto sa Phoenix, miingon, “Ginoo, pun-a ang akong baba og maayong mga pulong, ug dayon kuhita ako kon igo na ang akong mga nasulti.” Nakita n’yo? Oo. “Kuhita ako kon igo na ang akong mga nasulti.”

116 Bueno, matikdi n'yo karon, magsugod tà gikan sa ika-15 nga kapitulo, o sa ika-15 nga bersekulo sa ika-3 nga kapitulo, paminaw mo og ayo karon.

*Samtang ginaingon, Karong adlaw kung kamo...
magapatalinghug sa iyang tingog, ayaw ninyo pagahia
ang inyong mga kasingkasing, ingon sa paghagit.*

117 Karon matikdi n'yo ang ginapamulong dinhi ni Pablo. Karon ang ingon, "Karong adlaw, human sa hataas nga panahon." Moabot ra kita dinha pagkataudtaud, nga ang ingon, "Karong adlaw, sa hataas nga panahon." Sa sunod nga kapitulo kana, "Human sa hataas nga panahon."

*...ginaingon, Karong adlaw kung kamo...
magapatalinghug sa iyang tingog, ayaw ninyo pagahia
ang inyong mga kasingkasing, maingon sa adlaw sa
paghagit, kaniadtong gihagit nila ang Dios.*

118 Karon basahon nato ang sunod nga bersekulo.

*Kay kinsa kanila, sa nanagpakadungog sila,
nanaghagit:...*

Karon unsa man kining iyang ginahisgotan? Ang Ebanghelyo.

*...dili ba ngatanan sila nga namahawa sa Egipto
pinaagi kang Moises.*

*Ug kinsa ang Iyang mga gikasuk-an sulod sa kap-atan
ka tuig? dili ba ang mga nagpakasala, kang kinsang mga
lawas nangapukan didto sa kamingawan?*

119 Mohunong sà ta dinhi sa makadiyut. Sa paghagit, "kaniadtong ilang gihagit." Bueno unsa ma'y gibuhay sa Dios? Karon mao kana ang gipaningkamotang isulti ni Pablo. Unsa man Kadtong nanguna kanila pagawas sa Egipto? Si Moises ba? Dili. Si Moises instrumento ra man nga unod.

120 Karon aduna man kita'y basihan dinhi. Buut natong maiklaro kini karon. Pagmoabot na kita niini nga bahin dinhi, sa pipila ka gutlo, inyong—inyong makita kini.

121 Bueno, gitugot sa Dios ang Iyang katawohan nga magkaaduna niadtò og dili-permanente nga kapahulayan. Atua man sila sa Egipto. Wala sila sa ilang hustong puwesto. Wala sila sa ilang kaugalingong-yuta. Mga lumalangyaw ug mga magpapanaw sila, ug mao nga ipahigawas sila sa Dios gikan niadtong dapit nga ilang gilangyawan, sa—sa Egipto, paingon sa ilang kaugalingong-yuta.

122 Tipo gihapon sa karong panahon; wala kita'y pagka-permanente. Ngani dinhi dili man nagalungtad ang panahon. Una mga gagmay'ng batang lalaki nga matambok pa ang mga kamot nga nagadula og dyolen, mga batang babaye nga may mga munyeka pa, nga ginadula-dulaan; mahibaloan mo na lang,

aduna na'y uban ang imong buhok, ug nangunot ka na. Aduna gyu'y sayup dinhi. Dili kini ang atong puloy-anan. Anaa kita sa sayup nga dapit. Mao kana kon nganong ginaingon nato nga mga magpapanaw ug mga lumalangyaw ra kita. Aduna ma'y nahitabo.

¹²³ May usa ka gamay'ng gining, kaganinang buntag dinha sa lawak, ang nagsulti mahitungod sa mga tawo nga ginakatawan kono siya, usahay. Ingon ko, "Apan, minahal, nga igsoong babaye, dili man gud ka usa sa ilaha." Lahi kita nga klase sa katawohan.

¹²⁴ Miingon ang akong batang babaye, "Daddy, may *ingon-ani-og-ingon-ana* lagi nga mga batang babaye nga *ingon-ani-og-ingon-anang* butang ang ilang ginabuhat."

¹²⁵ Ingon ko, "Apan, tan-awa, pinangga," aduna man gud sila nianang mga plaka ni Elvis Presley, ingon ko, "Ayaw baya nako og mga ingon-niana sa akong balay."

¹²⁶ Ingon siya, "Pero, daddy, mga buutan man sila nga mga bata."

¹²⁷ Ingon ko, "Siguro mga buutan sila. Wala ko'y unsa man nga masulti batok niana. Pero adunay usa ka butang, lahi man gud kita. Lahi kita. Dili tungod nga gusto ra nato nga mahimong lahi, kondili ang Espiritu nga ania sa sulod nato migawas na man gikan dinha. Mao nga taga laing kalibutan ka na."

¹²⁸ Ngani kaniadtong miadto ako sa Africa, wala ako makaangay sa ilang-ilang-ilang mga pamaagi sa pagkinabuhi. Dili sila nagasul-ob og unsa man nga sinina. Mga hubo ra sila. Ug nagapamunit pa gyud sila og butang nga dunot na, nga may mga ulod na, og kaonon nila kini, bisan pa'g giulod na, og wala kadto'y diperensya sa ilaha. Kita n'yo?

¹²⁹ Ug Kini pud lahi gyud. Kabalo mo, kaniadto, ingon niana usab kitang tanan, pero gihatud sa ato ang sibilisasyon ug nahimo kitang lahi.

Ug nadoble pa gyud kana minilyon ka pilo tungod sa pagkakabig. Ayaw na nato sa mga dunot nga butang nga iya sa kalibutan. Gihimo na kitang mga Cristohanon ni Cristo, sama sa sibilisasyon nga nagtukmod kanato nga mahimong limpyo. Ug matikdi, dili lamang kana, kondili ginapamahayag pud nato nga mga magpapanaw ug mga lumalangyaw ra kita. Dili kita taga dinhi sa kalibutan. Kung ingon-ana, ayaw na ninyong magkaaduna og unsa man nga kahilambigitan sa kalibutan. Ug kanang mga butanga nangagi na.

¹³⁰ Bueno, atua ang Israel didto sa Egipto. Pero dili sila mga Egiptohanon. Sa mga Egiptohanon, kaulawan para sa usa ka Egiptohanon ang mohawid og karnero. Ug ang Israel mga magbalantay man sa karnero. Ug naapektuhan gyud

tingali si Moises, human nga nawad-an og dungog ingon nga Egiptohanon, og nahimong magbalantay sa kabakahan.

Namatikdan n'yo ba ang gisulti ni Faraon ngadto kang Joseph, ug sa uban pa? “Dulumtanan kana.” Miingon, “Ang imong mga kabanay mga magbalantay diay sa karnero.” Ug dili puedeng hawiran sa usa ka Egiptohanon bisan ang magbalantay sa karnero. Lahi siya nga klase sa tawo.

¹³¹ Ug ingon niana usab sa usa ka Cristohanon, sa karong panahon, sa dihang natawo na siya pag-usab. Dili na... Mahugaw na para kaniya ang makighilambigit og makaadto sa lugar kon diin nagahuboghubog ang mga tawo ug nagasulti'g mahugaw nga mga pagpakatawa, ug hubo ang mga kababayen-an. Ug ang tanan... Kana, kana'y—kana'y kahugawan gayud. Oh, dalaygon ang Ginoo! Mga magpapanaw ra kita dinhi. Mga lumalangyaw ra kita dinhi. Ang espiritu nabag-o na, ug nagapangita kita og usa ka Siyudad kon diin ang mga kababayen-an dili nagasul-ob og purol. Nagapangita kita og usa ka Siyudad kon diin wala na'y mga balay-imnanan. Nagapangita kita og usa ka Siyudad kon diin nagapuyo ang pagkamatarung. Busa, mga magpapanaw ra gyud kita.

¹³² Ug, mikanaug ang Dios diha sa usa ka dakung Kalayo, sama sa usa ka Halo, mikunsad ngadto sa usa ka sapinit ug gipadayag ang Iyang Kaugalingon ngadto kang Moises, una. Miingon si Moises...

Kabalo man mo sa leksyon nga atong nahisgotan niadtong miaging gabii, kung unsa nga kaniadtong ania pa si Jesus sa yuta, miingon Siya, “Bueno, sa wala pa si Moises, MAO NA AKO.” Si Jesus kadto nga atua sa nagadilaab nga sapinit, sa Haligi nga Kalayo. Si Jesus kini, sa gihapon, sa karong panahon.

Ug gipadayag Niya ang Iyang Kaugalingon diha sa usa ka Haligi nga Kalayo, ug nagkaaduna si Moises og kasinatian. Miadto siya sa Egipto. Giwali niya ang Ebanghelyo, ang maayong balita, ug minunot kaniya ang mga ilhanan ug mga katingalahan. Nasabtan n'yo ba? Mao ra usab sa karong panahon.

¹³³ Dili lamang kana, kondili kaniadtong nanggawas ang mga Hebreohanon, nanaglakaw sa Kahayag, gipangunahan sila sa mao ra mismo nga Haliging Kalayo. Ug miingon ang Biblia nga, “Dili mo pagtintalon ang Dios.”

¹³⁴ Matikdi n'yo kini. Ako kining basahon.

Samtang ginaingon, Karong adlaw kung kamo... magapatalinghug sa iyang tingog, ayaw ninyo pagahia ang inyong kasingkasing, (ang Iyang Tingog nga nagapakigsulti sa inyong kasingkasing.) ingon sa paghagit. (Kaniadtong gihagit nila Siya.)

Paminaw mo.

Kay kinsa kanila, sa nanagpakadungog sila, nanaghagit: . . .

¹³⁵ Pila man ang nasayod nga gihagit sa mga Israelita ang Dios tungod sa ilang dili-pagtoo? Nanagbagulbol sila, silang, tanan. Miduol mismo didto ang Dios. Ug sa diha nga silang tanan. . . Wala magdugay, nagkaproblema sila.

Atua kadtong Haligi nga Kalayo sa ibabaw nila. Wala ko kabalo kon nakita ba nilang tanan Kadto, o wala. Pero, nakita Kadto ni Moises. Ug anaa Kadto sa ibabaw nila, ug ginatan-aw nila Kadto. Ug kaniadtong nagapadayon sila. . . Ingon ta nga wala nila Kadto nakita, wala ko kabalo kon nakita ba nila o wala. Pero nagauna Kadto kanila. Ang Biblia miingon nga atua Kadto didto.

¹³⁶ Gikaingon usab, “Nagauna kadtong Bitoon sa maalamon nga mga lalaki.” Walay si kinsa man ang nakakita Niadto kondili ang maalamon nga mga lalaki lamang. Miagi kadto sa matag obserbatoryo. Ginasonod man sa mga tawo kaniadto ang oras pinaagi sa mga bitoon. Wala gyu’y si kinsa man ang nakakita Niadto kondili ang maalamon nga mga lalaki lamang. Tungod sila ra man gyud ang makakita Niadto, ug para man sa maong maalamon nga mga lalaki gipadala ang Bitoon.

¹³⁷ Ug gipadala ang Haligi nga Kalayo ngadto kang Moises, ug gipadala pud si Moises ngadto sa mga anak sa Israel. Ug mao nga kinahanglan nila nga mosunod kang Moises. Makita nila si Moises, ug makita pud ni Moises ang Kahayag.

Mipanaw na sila. Dayon mibiya na sila. Ug sa nakagawas na sila, miabot sila sa Dagat nga Mapula. Ug, oh, wala pa gyud sila—sila nakakita niadtong mga ilhanan sa mga milagro ug mga ingon-adtong butang nga nangahitabo samtang atua pa sila sa—sa karaang yuta sa Egipto, apan sa dihang nakagawas na sila didto og atua na sa ilang pagpanaw, nga bag-o pa lang nakabig ug napahigawas. Ug, mahibaloan mo na lang, nagkaproblema na dayon sila.

¹³⁸ Gusto man gud sa Dios nga dalhon kamo sa kalisdanan. Gusto Niyang ipahamtang kamo sa kalisdanan ug tan-awon kung unsa ang pagabuhaton n’yo bahin niini. Busa gipababag Niya ang Dagat nga Mapula, ug mahibaloan mo na lang, gipamartsa Niya sila paingon niadto nga dapit, dayon gipagukod ngadto kanila si Faraon. Kita n’yo na kung unsa kagusto sa Dios nga buhaton ang ingon-ana? Gusto man gud Niyang ipakita ang Iyang gahum ug gugma. Dios man Siya, ug mao nga gusto Niyang ipakita kaninyo kung Kinsa Siya. Amen.

Pero ang problema, sa karong panahon, moingon man ang mga tawo, “Oh, milabay na man kana nga mga adlaw.” Dili. Unsaon man pagpakita sa Dios ang Iyang Kaugalingon, kon natudloan kamo og mga ingon niana? Apan gusto gihapon sa Dios nga ipadayag ang Iyang Kaugalingon.

139 Atua didto ang mga anak sa Israel, nga nagalakaw sa Kahayag. Si Moises, nagauna siya sa ilaha. Atua sila. “Ari kamo. *Kini* mao ang dalan. Nagatawag ang Dios. Pagawas na kita. Paingon na tà sa yutang saad.”

“Oh, alleluyah!” Atua silang tanan, nga nanagsinggit, ug nagalukso-lukso, ug nagkaaduna og maanindot nga higayon, kabalo na mo. Ug mahibaloan mo na lang, nanglingi sila ug miingon, “Oh, naunsa man kanang mga abog?”

140 May usa kanila ang misaka sa usa ka bungtod, og miingon, “Oh, oh! Alaut, alaut! Kasundalohan man diay kana ni Faraon.”

141 Miingon ang Dios, “Unsa ma’y inyong gikahadlokan? Wala ba kamo mingtoo sa Akong mga gibuhad didto? Unsa ma’y inyong gikabalak-an? Nganong ginapasuko man Ko ninyo?”

142 Sa nakadangat na sila didto, miadto si Moises ug nangaliya sa Dios. Igo lamang giablihan sa Dios ang Dagat nga Mapula ug mitabok sila; samtang gisirhan ang kaaway. Ingon niana ang pagbuhat niini sa Dios. Ayaw kamo’g kahadlok. Ayaw kamo’g kanerbiyos. Ayaw kamo’g kalisang. Tungod ginahagit n’yo lang ang Dios.

143 Pagkahuman unsa ma’y gibuhad Niya? Mora og, “Bueno, nahiagum gyud kita og usa ka dakung pagsulay; pero dalaygon ang Dios, nakasugakod tà niadto. Pero wala na kita’y pagsulay pa. Paingon na man kita sa yutang saad.” Ug gihatud Niya sila ngadto sa kamingawan, kon diin wala gyu’y tubig. Mahanduraw n’yo ba? Ang Dios, ngadto sa Iyang—sa Iyang gipabalaan, balaang katawohan, gihatud sila mismo ngadto sa *ingon-niadto* nga lit-ag; dayon gipahigawas sila gikan niadto nga lit-ag, ug gihatud na pud sila didto mismo sa kon diin walay tubig. Samtang mahimo man Niya unta nga dalhon sila sa usa ka dapit kon diin anaa gyu’y tubig. Aba, mahimo ra pud unta Niyang magbuhat og sapa, diritso sa ilang dalanon, kung gustohon Niya. Mahimo pud unta Niya nga ang matag bukid mobugwak sa kalipay, og magpaagay og tubig singkwenta ka piye ang kahabogon, kung gustohon Niya. Oo, mahimo gyud Niya. Apan kung gibuhad Niya ang ingon-ana, nan mahimo pud nga masayon na lang kaayo. Oh, gusto ko kini! Dalaygon ang Ngalan sa Ginoo.

144 “Nganong gitugot man sa Dios nga mahitabo ang *ingon-ani*, Igsoong Branham? Nganong ang Dios. . .?”

Ang Dios mismo ang nagabuhad niana. Pasagdi lang Siya. Padayon lang mo. Buluhaton kana sa Dios. “Ang paglakaw sa matarung gitukod sa Ginoo.” Oo, sir. Unsa ma’y diperensya niana?

145 “Nawala ang tanan kong kuwarta, Igsoong Branham.” Bueno, dalaygon gihapon ang Dios, bisan pa man.

146 “Oh, gibuhat ko man ang *ingon-ani*, ug *ingon-ani* na hinoon ang nahitabo, giguba sa bagyo ang akong balay.”

147 Dayga gihapon ang Dios, bisan pa man. “Ang Ginoo mihatag, ang Ginoo mikuha, dalaygon ang Ngalan sa Ginoo.” Padayon lang sa paglakaw. Kining tanan alang man sa kahimayaan sa Dios. Nasayod mismo ang Dios sa Iyang ginabuhat.

Usahay sa tubig, usahay sa baha,
Usahay sa daku nga pagsulay, apan sa kanunay
pinaagi sa Dugo.

148 Sa ingon-anang paagi Niya sila ginapangunahan. Husto kana. Oh, my! Gibati ko nga daw sa gusto kong mohunong ug mosinggit. Sa ingon-anang paagi Niya ginapangunahan ang Iyang minahal nga mga anak. Oh, inyo bang mabati...? Karon, dili baya ako usa ka sikolohista, apan inyo bang mabati ang mahiligugmaong Espiritu nga nagalukop sa tibuok bilding karon? Unsa kaha kung maablihan ang atong mga mata karon dayon, ug makita ang nagatindog dinha sa kilid sa mga dingding, og sa tibuok pasilyo?

149 Ang tigulang nga si Eliseo kaniadto, usa ka buntag, sa dihang ang batan-ong lalaki ingon gayud ka buta, nga miingon, “Tan-awa ang mga Sirianhon didto.”

Miingon, “Apan mas daghan man ang nagauban kanato.”

Miingon, “Wala ma’y bisan usa nga akong nakita.”

Miingon, “Ginoo, ablihi ang mga mata niining batan-on.”

150 Mitan-aw siya sa palibot niadtong tigulang nga propeta, sa tibuok palibot, nagdilaab diay ang mga kabukiran, ug may mga kabayo nga Kalayo, ug mga carro nga Kalayo. Nakumbinsi gud siya niadtong higayona.

151 Ingon siya, “Moadto ta didto ug butahan sila.” Ang ilang panan-aw ingon man gayud unta ka tin-aw, pero mga buta sila ngadto kaniya. Miingon pa, “Ginapangita ba ninyong tanan si Elias?”

Miingon, “Oo.”

152 Miingon, “Umari kamo, ipakita ko kaninyo kung diin siya.” Ug siya na diay kadto, nga nagapanguna sa ilaha. Pero wala sila nasayod niadto.

153 Ingon niana usab sa karong panahon. Ania si Cristo. Ania ang Espiritu Santo, nga ginabuhat ang mao gihapong mga butang nga ginabuhat na Niya sa una pa, pero buta Niini ang kalibutan. Wala sila masayod Niini. “Oh, ako—wala ako masayod mahitungod Niana. Ang akong pastor...” Oh, makaluluoy’g nagmaluyahon nga mga tawo! Nasabtan n’yo ba ang buut kong ipasabot? Mga buta sila Niini. Wala sila masayod Niini. Ang Dios man ang nagapanguna.

154 Bueno, nahidangat sila, ngadto sa Kamingawan sa Sala, wala gyu'y tubig didto. Pero ang Dios lang gayud ang nagahatag sa tanan-tanan. Oh, ug nakakaplag sila og gamay'ng lim-aw sa tubig, ingon sila, "Mao na kini." Ug dili gani nila matilawan kadto. Oh, ngil-ad man gud kaayo ang lasa niadto. Grabe, mas grabe pa kadto—kadto sa sinto porsyento nga sulfur. Kita n'yo, mora og bugok nga itlog, kabalo na mo. "Oh, grabe! Kangil-ad gayud." Hilo gyud kadto. Bueno, gitawag kadto og Kamingawan sa Sala. Nagatubo didto ang pipila ka kahoy'ng palma, ug didto sa may tubod nagatubo kadtong mga palma. Dayon miingon si Moises, "Ayaw. . ."

155 Miingon ang Dios, "Nganong ginabuhat nila kini? Ngano man nga ginabuhat nila kini? Nganong ginahagit nila Ako? Bueno, kung gibuhat Ko *kana* kaniadto, dili Ko ba mabuhat ang usa ka butang para niini nga kahimtang?"

156 Kung gihaw-as Niya kamo gikan sa usa ka sakit, dili ba diay Niya mahimo nga haw-ason kamo gikan sa usa na usab ka sakit? Kon gihaw-as Niya kamo gikan sa usa ka problema, dili ba Niya mahimo nga haw-ason kamo gikan sa usa na usab ka problema? Dalaygon ang Dios! Kung gihaw-as Niya ako gikan sa sala, nan mahimo sàb Niya nga haw-ason ako gikan sa lubnganan. Dios man Siya. Unsa ma'y kalahian niana? Padayon lang mo, isentro n'yo ang inyong mga mata ngadto Kaniya.

157 Miingon, "Kung gisirhan Ko ang Dagat nga Mapula, ug gilumsan kadtong mga Egiptohanon, dili Ko ba mahimo ang usa ka butang para niini nga tubig? Nganong ginapasuko man Ko ninyo? Oh, ang inyong dili-pagtoo! Inyo Akong ginahagit sa pagkasuko, tungod sa inyong dili-pagtoo."

158 Karon ang gigamit dinhi nga pulong, "Sala," nahagit. Nahimo. . . Ang hinungdan nga nabuhat nila kadto, wala man sila mitoo. Ngani wala man sila nagbagdoy-bagdoy didto ug nanagsugal, kaniadto, ug mga ingon nianang butang. Wala pud sila nakigkuyog-kuyog sa asawa sa ubang tawo, ug nangadto ug nanulti'g bakak. Dili ingon niana ang ginabuhat nila kaniadto. Hinoon, dili man kana mao ang sala, sa sugod pa lang.

159 Ang magkinabuhi diha sa pagpanapaw dili man mao ang sala. Ang pagpanigarilyo, pagmama, paghuboghubog, pagsugal, pagpamalikas, pagpanumpa, og uban pa, dili kana mao ang sala. Mga bunga lang kana sa dili-pagtoo. Ginabuhat mo kana tungod kay usa ikaw ka dili-magtotoo. Kay kung usa gyud ka ka magtotoo, dili mo man buhaton kana. Mao kana'y hinungdan nga miingon si Jesus, "Siya nga nagapatalinghug sa Akong mga Pulong ug *nagatoo* Kaniya nga nagsugo Kanako, adunay Kinabuhing Walay Katapusan." Dili *ingon* nga nagatoo ra siya, kondili tinuod gayud nga nagatoo! Mao kana. Walaon niana palayo sa inyo ang tanang unang kapanghimatuoran. Kita n'yo? Karon, mao kana.

Dili nga, “Siya nga nagapatalinghug sa Akong mga Pulong ug nagasinggit.” Dili nga, “Siya nga nagapatalinghug sa Akong mga Pulong ug nagasulti’g laing mga pinulongan.” Dili pud, “Siya nga nagapatalinghug sa Akong mga Pulong ug may dugo diha sa iyang kamot o sa iyang nawong,” o unsa pa man. Dili ingon niana.

“Siya nga nagapatalinghug sa Akong mga Pulong ug nagatoo Kaniya nga nagsugo Kanako, adunay Kinabuhing Walay Katapusan, ug dili Pagahukman sa silot, kondili miagi na gikan sa kamatayon ngadto sa Kinabuhi.”

¹⁶⁰ Unsa ba ang sala? Dili-pagtoo. Mahimong adunay motungha, og imbis nga moadto mismo sa Kasulatan ug hibaloong kung Kini’y tinuod ba o dili, “Oh,” moingon mo, “Ako...Dili! Kita n’yo, kamo, padayon lang mo dinha. Magpadayon ra pud ko ingon nga Presbyterian, kita n’yo.” Padayon mo, nga magpakabuta, ug ginahagit n’yo gayud ang Dios.

¹⁶¹ Sa dihang nagabuhat ang Dios og unsa man, ginalauman pud Niya nga dawaton unta Kini sa nasud. Apan, imbis nga ingon niana, “Kabalo mo, bueno, wala man gud ko masayod mahitungod Niana.” Kita n’yo? Ginalauman Niya nga dawaton unta Kini sa mga tawo. Pero kung may kabalaka gayud kamo, nan lingkoran n’yo ug susihon gyud ang Kasulatan. Sutaan n’yo Kini ug susiha Kini, balik-baliki gyud, ug hibaloa kung nahitabo ba Kini, kung gitagna na man Kini nga mahitabo, ug uban pa. Dayon madawat n’yo Kini. Amen.

¹⁶² Karon matikdi.

Samtang...Karong adlaw kung kamo... magapatalinghug sa iyang tingog, ayaw ninyo pagahia ang inyong kasingkasing, ingon sa paghagit, kaniadtong nahagit ang Dios kanila, nakita n’yo.

Kay kinsa kanila, sa nanagpakadungog sila, nadungog ang maayong balita nga giwali ni Moises, nanaghagit: dili ba ngatanan sila nga namahawa sa Egipto pinaagi kang Moises.

¹⁶³ Pila man ang nasayod kung pila ra ka tawo ang naluwas gikan niadtong orihinal nga pundok nga migawas? Pila man? [Adunay nagaingon, “Duha.”—Ed.] Duha ra, husto. Pila man ang nasayod sa ilang mga ngalan? [“Caleb ug Josue.”] Husto kana. Si Caleb ug si Josue, ang duha nga nahibilin, gikan niadtong sobra duha ka milyon.

¹⁶⁴ Paminawa n’yo kini. “Ug iyang...” Sa ika-17 na nga bersekulo.

Ug kinsa ang iyang mga gikasuk-an sulod sa kapatan ka tuig, tungod sa dili-pagtoo. Dili ba ang mga nagpakasala, wala nanagpanoo...?

¹⁶⁵ Basaha n'yo ang diksyunaryo ug hibaloa n'yo kung unsa ang kahulogan sa *sala*. Basaha n'yo ang diksyunaryo nga mahitungod sa Biblia. Kini mao ang dili-pagtoo. Ang *dili-pagtoo* mao ang “sala.” “Ang dili nagatoo nahinukman na sa silot,” San Juan 4, kita n'yo, “nahinukman na sa silot.”

...kang kinsang mga lawas nangapukan didto sa kamingawan?

Ug kang kinsa siya nanumpa nga dili sila makasulod sa iyang kapahulayan,...

¹⁶⁶ Tungod sa inyong dili pagtoo! Oh, basin dili na ko makadangat sa akong kapitulo. Apan, ania, mao kana'y problema sa niini nga nasud, sa karong panahon. Miagi na ang mga ilhanan ug mga katingalahan dinhi sa tibuok nasud. Pero unsa ma'y ginabuhat nila? Padayon ra nilang ginatalikdan Kini. Ug miingon Siya, “Gipanumpa Ko nga dili Ko sila tugotan nga makasulod sa Yuta nga ilang pagaadtoan.”

¹⁶⁷ Unsa man pu'y nagakahitabo sa niining dagkung mga iglesia karong panahona? Ginahagit nila ang Dios tungod sa ilang dili-pagtoo. Alleluyah! Makahimo Siya sa niining mga bato sa pagpatindog og mga anak kang Abraham. Gipaningkamotan Niyang ihatag sa ilaha ang Ebanghelyo, pero gipagahi ra nila ang ilang mga kasingkasing. Nanaghimo sila og mga kulto, ug nanaghimo sila'g gagmay'ng mga denominasyon, “Ug *kini* ang among ginatooan ug wala na'y lain,” ug mao nga dili na makasulod ang Dios. Asa man sila karon? Anaa na lang dinha sa daplin.

¹⁶⁸ Samtang ang diyutay'ng, maunongon nga pundok sa Dios nagapadayon, og ginaubanan og mga ilhanan ug mga katingalahan. Ginasulayan Niya sila. “Ang matag anak nga nagaduol sa Dios kinahanglan una nga masulayan ug mapamatud-an,” binansay ingon nga anak.

¹⁶⁹ Pag may gamay'ng mahitabo, “Oh, bueno, wala gyud Kana'y pulos, siguro.” Kung ingon-ana ilehitimo ka nga anak, ug dili usa ka anak sa Dios.

¹⁷⁰ Kay ang usa ka anak sa Dios Binhi man ni Abraham, nga ginatawag kadtong mga butang nga wala nagalungtad, ingon nga nagalungtad og, “Mao kini ang giingon sa Dios,” ug sige siya nga nagapadayon. Amen. Bisan unsa pa'y ginasulti sa ilaha, o unsa man nga lahi, nagapadayon gihapon sila, bisan pa man. “Mao kini ang giingon sa Dios.”

¹⁷¹ Baynte-singko ka tuig niyang gihulat kadto nga anak, bisan unsa pa ka daw kasukwahi kadto. Ug gihimulag niya ang iyang kaugalingon gikan sa mga dili-magtotoo, amen, aron nga makatoo gyud siya. Oh, pagkanindot! Gibati ko ang pagkarelihiyoso.

Palandunga n'yo kini. Kinahanglan n'yong ihimulag ang inyong kaugalingon gikan nianang dogma sa kalibutan, "Ah, milabay na ang mga adlaw sa mga milagro. Wala gyu'y ingon nianang butang nga sama Niana. Panatisismo ra kana." Ihimulag n'yo ang inyong kaugalingon.

¹⁷² Miingon ang Biblia, "Panggula kamo gikan kanila, ug magpalain kamo, ang ingon sa Ginoo, ug dawaton Ko kamo." Pagkanindot gayud! "Dawaton Ko kamo," pagkahuman n'yong ihimulag ang inyong kaugalingon. "Kamo mahimo nga Akong mga anak, Ako mahimo nga inyong Dios." Ihimulag n'yo ang inyong kaugalingon, ayaw kamo pagpahiangay sa inyong kaugalingon kauban sa mga dili-magtotoo. Tinuod kana.

¹⁷³ Kon ang batan-ong lalaki magminyo, makigminyo sa usa ka babaye nga dili nagatoo; o ang usa ka batan-ong babaye makigminyo sa usa ka lalaki nga dili nagatoo. Ayaw n'yo buhata kana. Dili ko igsapayan kung unsa man siya kaguwapo, ug—ug, o kung unsa man siya kaguwapa, ug kung unsa man kanindot ang dagku niyang mga mata; mahanaw ra kana usa sa niining mga adlaw. Apan, igsoon, ang imong kalag man mao ang mabuhi hangtud sa kahangturan. Mao nga mag-amping gyud kamo sa ginabuhat ninyo. Kon dili man usa ka tinuod nga magtotoo kanang babaye, o dili usa ka tinuod nga magtotoo kanang lalaki, nan ayaw gayud kamo pagpahiangay sa inyong kaugalingon sa ingon niana. Pahilayo kamo sa mga ingon niana. Maghinungdan lang kana sa inyo og problema sa umalabot.

¹⁷⁴ Karon paminaw mo, ika-17 nga bersekulo.

Ug...kinsa ang iyang...mga gिकासuk-an sulod sa kap-atan ka tuig? Dili ba ang mga nagpakasala, kang kinsang mga lawas nangapukan didto sa kamingawan?

...kang kinsa siya nanumpa nga dili sila makasulod sa kapahulayan,...

¹⁷⁵ Nakagawas man sila, ug, nasaksihan nila ang mga milagro, apan wala gyud sila nakadangat sa yutang saad. Kondili kadtong pinili lamang, ang duha, ang maoy nakasulod sa yutang saad.

¹⁷⁶ Karon unsa ba ang ginabuhat ni Pablo? Nagapakigsulti siya sa mga Cristohanon niadtong panahona, "Ayaw n'yo itugot nga kining mao ra nga Ebanghelyo, nga gikawali na kaniadto, nga may mga ilhanan ug mga katingalahan, ug gipangunahan pa sila sa Haligi nga Kalayo; pag mahitabo na usab kining mga butanga, dili unta kamo mapukan diha sa daplin sa dalan, tungod sa dili-pagtoo, nga mopaingon sa pagduhaduha, kay nangapukan kaniadto ang ilang mga lawas didto sa kamingawan."

¹⁷⁷ Karon paingon na kita dinha, dalion ko na kini. Matikdi n'yo og ayo.

...kondili kadtong mga wala nagkinabuhi?

Ug nakita nato nga wala gayud sila makasulod tungod sa pagkawalay-pagtoo.

Gitawag niya kining *sala* sa makausa, gitawag na pud niya kining *dili-pagtoo* sa misunod nga higayon. Ang *dili-pagtoo* mao ang “sala.” “Wala sila makasulod, tungod sa ilang dili-pagtoo.”

¹⁷⁸ Nasaksihan man nila kadtong propeta, nga si Moises. Nasaksihan nila ang mga gibuhay niya, nasaksihan pud ang mga gisulti niya. Tinuod kadto, sa matag higayon, nga nagpadayon, sa maong Kamatuoran. Nagpakita man gani kining Haligi nga Kalayo sa atubangan nila kaniadto. Gitan-aw nila Kini. Nasaksihan nila Kini.

¹⁷⁹ Si Pablo, sa pagpaningkamot, pagkahuman niadto, aron masabtan kining, kasinatian nga iyang naangkong. Kita n’yo? Sa pagpaningkamot nga maitakdo niya ang maong kasinatian, gitipo niya kadto sa Daang Tugon. Ingon siya, “Karon misulod na kita sa usa ka bag-ong butang, sa niining bag-ong dispensasyon, pinaagi ni Jesus Cristo. Sa karaang mga panahon, nagpakita kanila ang Ginoo pinaagi sa mga propeta, apan karon pinaagi na Kaniya sa Iyang Anak, nga si Jesus.” Kita n’yo? Ug gitipo niya ang maong mga kasinatian ug gipakita kanila kung unsa ang nagakahitabo, kung unsa ang mga ilhanan ug mga katingalahan, ug tanan na, ug kung unsa ang nahisulat.

¹⁸⁰ Bueno ingon niya, “Wala sila makasulod, tungod sa ilang dili-pagtoo.” Wala sila mitoo.

¹⁸¹ “Apan karon, kita, misulod na kita sa usa ka dispensasyon, ug ayaw n’yo pagahia ang inyong kasingkasing. Ayaw kamo pag-akto nga sama sa gibuhay nila, sa mga adlaw sa paghagit, kaniadtong gihagit nila ang Dios.” Giunsa man nila pagbuhay niadto? Dili pinaagi sa imoral nga pagkinabuhi. Tugoti kong ipatin-aw kini og ayo nganha kaninyo.

¹⁸² Moingon mo, “Igsoong Branham, nagasimba man ko.” Maayo kana. “Wala ako namakak sukad-sukad sa tibuok kong kinabuhi.” Maayo kana. “Wala ko nangawat. Wala ko gibuhay ang *ingon-ani*, *ingon-ana*, o *uban* pa.” Maayo gyud kana. Maayo kana tanan. Apan, dili gihapon kana mao ang sala.

¹⁸³ Ang sala maoy pag gipakita na sa Dios ang Iyang Kaugalingon ug wala gihapon kamo mitoo Niini, ayaw ninyong magpatalinghug Niini.

¹⁸⁴ “Oh,” moingon mo, “ang akong iglesia wala man nagtudlo Niana.” Basta ginatudlo Kini sa Biblia, ug ginapamatud-an Kini sa Dios, mao kana ang importante.

Karon matikdi n’yo kini sa makadiyut. Bueno magsugod na ta karon sa usa ka butang nga halawom, gyud kaayo. Karon, isulod usa ang inyong konsensiya diha sa balsa sa inyong saleko hangtud nga makagawas kamo.

¹⁸⁵ Karon matikdi n’yo og ayo.

Busa mangahadlok kita, kay tingali unya, sanglit may saad nga gibilin aron makasulod sa iyang . . .

Sa iyaha nga lalaki, sa iyaha nga babaye, personal nga mga puli-ngalan baya ha. Unsa man?

. . . may bisan kinsa kaninyo nga daw dili makakab-ot niini.

¹⁸⁶ Karon, gipaningkamotan gyud ni Pablo nga isulti kanila, diha sa nauna nga kapitulo, ang mahitungod sa tanan niining mga butang. Apan karon ang gipaningkamotan na niyang isulti kanila mao ang kung unsa gayud Kini.

Oh, aduna pa ba kita'y oras? Akong . . . Siguro mas maayo nga maghulat na lang ta hangtud unyang gabii. Udto na man gud, ug magpahigayon pa kita og panerbisyo sa pag-ampo. Mas maayo siguro kon hisgotan pa nato kini unyang gabii, tungod kay puno gayud kini og mga bitamina, espirituwal nga mga bitamina. Daghan pa'y kinahanglan buhaton ug mao nga basin okupado gyud ko unyang hapon. "Kita gayu'y . . ."

Busa mangahadlok kita, kay tingali unya, sanglit may saad . . .

¹⁸⁷ Karon, aduna ba'y gisaad kanila nga yutang saad, sa didto pa sila sa Egipto? Ug, sa dihang, mikanaug ang Dios, aron himoon nga tinuod kini nga saad. Gani, gisultihan na man sa Dios si Abraham, gatusan ug gatusan ka mga tuig kaniadto, nga Iyang pagabuhaton kini. Sumala kadto sa Kasulatan.

¹⁸⁸ Miingon si Joseph, "Ayaw ninyo ibalhin ang akong mga bukog gikan dinhi hangtud nga mopaingon na kamo sa yutang saad ug ilubong n'yo ako didto kauban sa tanan kong mga ginikanan." Tungod kay, nasayod man siya nga moabot gyud ang pagkabanhaw, pag mabanhaw si Jesus gikan sa mga patay, og tungod kay hingsayran man niya ang gikasulti ni Job. Kita n'yo?

¹⁸⁹ Ang matag usa kanila nga mga propeta nasayod gayud sa kung unsa ang gisulti sa uban pa nga propeta, ug nasayod nga mao ra mismo ang ilang Espiritu. Ug mao nga nagatukaw sila. Oh, igsoon! Angay gayud nga matay-og kita niini pagawas sa atong pangkalibutanon nga kahimtang. Nakasentro ang ilang mga mata, dili sa kung unsay ginasulti sa mga tawo, kondili sa kung unsa mismo ang gikasulti niadto nga mga propeta. Ang matag usa kanila nagatukaw gayud.

¹⁹⁰ Miingon pud si Abraham, "Ilubong n'yo ako dinhi mismo kon diin gilubong si Job." Ingon pa, "Sarah, mopalit ako og yuta. Igalubong kita dinhi mismo."

¹⁹¹ Si Isaac usa man sàb ka propeta, sama sa iyang amahan. Miingon, "Paminaw mo. Ayaw ko ninyo ilubong sa bisan asa pa man, dili dinhi sa Egipto, kondili dalha ninyo ako pabalik mismo sa yutang saad. Ilubong n'yo ako didto mismo."

¹⁹² Si Jacob namatay man nga gawas sa yutang saad, pero giingnan pud niya ang iyang anak, nga usa sàb ka propeta, miingon, “Kabalo ka, usa niadto ka gabii gihikap ako sa Manulonda dinhi sa kilid. Mao nga nahimo na akong piang sukad niadto. Ari ka, ibutang ang imong kamot. . .” Oh, kaloy-an unta! “Anak kong propeta, tigulang na ako ug buta na ako. Apan ibutang ang balaan mong kamot, ingon nga usa pud ka mismo ka propeta, ibutang kini sa bahin kon diin gidapat sa Manulonda ang Iyang kamot, ug manumpa ka sa Dios sa Langit nga dili mo ako ilubong dinhi dapit.”

¹⁹³ Dalagyon ang. . . Nakita ba ninyo ang espirituwal nga kapadayagan sa Pulong? Aba, katunga kanila, halos nubenta porsyento, ang wala nasayod sa ilang ginasulti. Apan kabalo siya mismo sa iyang ginasulti. “Ibutang ang imong mga kamot nga iya sa propeta dinhi niini nga bahin kon diin gidapat sa Manulonda ang Iyang kamot. Usa ako kaniadto ka dakung, malig-on nga tawo, usa ka makusgan nga talawan. Apan, gihikap Niya ako, ug sukad niadto usa na ako ka piang nga tawo. Pero nahimo akong usa ka principe sukad niadtong napiang ako. Sukad niadtong nausab na ang paagi sa akong paglakaw, nahimo na akong usa ka principe.” Oo. “Ibutang ang imong kamot dinhi. Manumpa ka sa Dios sa Langit, nga dili mo ako ilubong dinhi.” Ngano man? Wala ma’y nasayod sa kung unsa ang iyang ginasulti. Pero nasayod si Joseph. Ingon man siya, “Dalha ako didto ug ilubong ako didto sa yutang saad.” Didto mismong dapita. Mao gayud.

¹⁹⁴ Kaniadtong namatay si Joseph, pila ka tuig human niadto, ingon siya, “Ayaw ko ninyo ilubong dinhi. Kondili pangitaa n’yo ang akong mga bukog pag moagi kamo dinhi, tungod kay sa umaabot nga adlaw manghawa man kamo dinhi. Ug pagmobiya na kamo, dalha n’yo ang akong mga bukog uban kaninyo.”

¹⁹⁵ Mao kana. Pasagdi ang kalibutan nga isulti ang gusto nilang isulti, ug buhaton ang gusto nilang buhaton. Dalaygon ang Ngalan sa Ginoo. Ipapabilin lang ako nga anaa kang Cristo, bisan bansagan pa ako og bisan unsa na lang, usa ka panatiko, o holy-roller. Sa umaabot nga adlaw moabot Siya, ug kadtong mga anaa kang Cristo pagadad-on sa Dios uban Kaniya, pag moabot na Siya. Kining tanan espirituwal gayud, og gipadayag nga Kamatuoran nga anaa na dinha mismo, ug mao nga gikinahanglan ang espirituwal nga panghunahuuna aron masabtan Kini. Sumalig kamo niana, sa tibuok adlaw. Palandunga n’yo kana. Bisin kung wala pa kamo’y paniudto, palandunga gihapon ninyo kana.

¹⁹⁶ Ug unyang gabii, maghisgot kita bahin sa Iyang Kapahulayan, nga gibilin, ug hibaloong kung unsa gyud kini nga saad para niining panahona. Unsa ba kini nga butang sa karong panahon? Kung wala Kini gibutang sa Dios dinhi sa Biblia, ug wala gipamatud-an Kini, ingon nga ania Kini mismo dinhi,

kung ingon-ana usa ako ka mini nga propeta. Eksakto gayud. Apan ania man gyud Kini. Unsa ba kini nga Kapahulayan?

197 Ingon siya:

Karon, *mangahadlok . . . kita, sanglit may saad nga gibilin* aron makasulod nga sama kanila, . . .

198 Ug kinahanglan nga mao gihapon Kini nga saad. Kinahanglan nga mao gihapon Kini nga kapahulayan. Kinahanglan nga mao gihapon Kini nga Dios. Kinahanglan nga mao gihapon Kini nga mga ilhanan. Kinahanglan nga mao gihapon kini nga butang. Busa managpahulay kita. Karon unsa ba gyud Kini? Hinaut nga ihatag kini sa Ginoo nganhi kanato, unyang gabii.

Samtang ginaduko nato ang atong mga ulo.

199 Mapanalanginong Ginoo, ang Eternidad lamang ang bugtong makapadayag sa mga mahimayaong butang nga amo karon ginaambit. Gamay . . .

Daghan ang gikatagana sa pagkahinukman sa silot. Maingon sa Imong gisulti diha sa Basahon ni Judas, nga, “Mga tawo, nga kaniadto gikatagana nang daan sa pagkahinukman sa silot, nga ginabaylo nila ang grasya sa atong Dios sa kalaw-ayan.” Ug ngani daghan sa karong panahon ang nagawali sa Ebanghelyo, sa grasya sa Dios, pero ginahimo na Kini nga usa ka pagpanguwarta, adunay dagku kaayo nga simbahan ug pag sa Sunday school na, ginahisgotan ang grasya sa Dios ug ginabaylo Kini sa kalaw-ayan. Ug buta ang kalibutan, ug nagalakaw nga sama sa buta nga mga baboy. Dili sila makasabot.

200 Oh Dios, ablihi para kanamo ang pagsabot. Itugot nga ang among pagsabot dili unta mahisama sa mga anak niining kalibutana. Kay miingon man Ka sa Imong Pulong, nga, “Ang mga anak niini nga kalibutan labi pang mga maalamon kay sa mga anak sa Kahayag.” Ingon na niana sa sinugdan pa lang, “ang mga anak ni Cain” nahimong bantugang hawod nga mga siyentista. Nahimo silang bantugan nga mga magtutudlo. Nahimo silang mga magbubuhay og materyales. Padayon sila nga nagalambo, og relihiyoso kaayo, apan mga hinukman na ug gilumsan diha sa paghukom. Ug ang ilang mga lawas nanaglutaw sa tubig, ug ang ilang mga kalag mipaingon sa impiyerno.

201 Ug miadto si Jesus ug nakigsulti kanila, kaniadtong namatay Siya. “Ug miadto sa impiyerno ug nagwali sa mga kalag nga atua sa bilanggoan, nga wala naghinulsol niadtong pagkamapailubong, mga adlaw ni Noe,” ang ingon sa Kasulatan. Ug ang Dios, samtang nagtindog Siya sa yuta, ingon Siya, “Maingon sa nahitabo kaniadto sa mga adlaw ni Noe, mao man usab sa pag-abot sa Anak sa tawo.”

²⁰² Apan namatikndan nato, “ang kaliwatan ni Seth,” mga tawong mapainubsanon, mga tinuod nga tawo sa Dios, wala kaayo’y nahibaloan sa mga butang nga iya sa kalibutan, walay pagkahingawa sa mga butang nga iya sa kalibutan, kondili gisalikway ang tanang kabug-at ug nagatoo sa Dios, ug nahimong mga propeta ug halangdong mga tawo sa Gingharian. Samtang ang uban, ang ubang relihiyosong kalibutan, ginakataw-an sila, og ginabiyabiay sila. Apan miabot ang takna kaniadtong miabot ang mga baha ug paghukom.

²⁰³ Mao man usab sa pag-abot ni Jesus Cristo. Gikataw-an ug gibiyabiyan gayud Siya, samtang aduna sila’y kaugalingon nilang mga relihiyon ug dakung mga simbahan. Apan gikataw-an nila ang Bitoon sa Kabuntagon, ug gibiyabiyan nila Siya. Busa misulod sila sa paghukom. Ug sa dihang mikalagiw sila ug misulod sa Jerusalem, didto gipanagkaon nila ang ila mismong mga anak, gumikan sa grabe nga kagutom, ug midagayday ang ilang mga dugo didto sa mga ganghaan sa kalsada kaniadtong gisunog sa mga Romano ang siyudad ug ang templo, ug ang ilang mga kalag mipaingon sa impiyerno.

²⁰⁴ Ginoo, ania kami pag-usab, sa ikatulo. Mao kini ang panahon sa kinabuhi. Ang tulo mao ang numero sa kinabuhi. Ug ania kami, nga andam na alang sa Pagsakgaw.

Sa pagpadayon sa Iglesia; ang bantugang siyentipikanhong kalibutan; og ang mga kaiglesiahan sa karong panahon puno na gayud sa maduhaduhaon nga mga magtotoo. Napulo ka linibo ang nanagsulat sa ilang mga ngalan diha sa libro, oo, minilyon gayud, ug ginakataw-an ra ang Ebanghelyo, ug moingon, nga, “Dili sila mga edukado. Wala sila’y nahibaloan.”

Tingali’g ingon niana man, Ginoo, apan ang among kakulang og edukasyon, ginapun-an man Nimo og grasya pinaagi sa pagpadala sa Imong Manulonda sa Kahayag, pinaagi sa pagpadayag sa Iyang gahum, og ginapanghimatud-an ang mga Pulong ngadto sa mga kabus ug walay kahibalo sama namo. Apan gihigugma Ka namo tungod niini, tungod kay ang grasya man sa Dios ang nagbuhat niini, ug nasayod kami nga mga natawo na usab kami. Ug dili gani kami hiligugmaon, man lang. Kami’y dili gayud hiligugmaon. Apan Ikaw, pinaagi sa grasya, gituyhod ang Imong maloloy-ong kamot ug giablihan ang among mga mata, tungod sa pag-ampo ni Jesus para kanamo; sama sa gibuhay ni Elias para kang Gehazi, samtang mitan-aw siya aron makita ang iyang palibot. Ug karon naabli na ang among mga mata, ug makita namo ang mga butang sa Dios, ug nasayod nga paingon na kami sa katapusang panahon; sa diha nga hapit nang matapos ang mga adlaw sa Gentil nga katawohan, ug mokuha Siya og usa ka katawohan alang sa Iyang Ngalan. Itugot nga mahiapil unta kami niana, Ginoo, mapainubsanon kaming nagapangamuyo. Ginaampo namo nga itugot Mo unta kini.

²⁰⁵ Panalangini kami. Panalangini kining diyutay'ng mga mananambong niining buntaga. Naglangkob sila sa tanang nagkalainlaing mga matang sa relihiyon ug mga tinooan, apan gipadaplin nila ang mga niini karon, Dios. Ug hinaut nga diritso silang motan-aw ngadto sa Kalbaryo, og moingon, "Dios, umula ako ug himoa ako. Sama ako sa . . ." Miingon ang propeta niadtong miadto siya sa balay sa magkokolon, aron nga dugmokon siya ug hulmahon pag-usab. Umula kami ug himoa kami nga sama sa porma nga gusto sa Dios para kanamo. Bisan pa kung mamahimong mga trapo lamang kami sa Balay sa Ginoo. Palabihon ko pa nga mamahimong trapo kaysa magpuyo sa mga balong-balong kauban ang mga dautan. Ug itugot kini, Ginoo. Panalangini lamang kami karon, ug ipapabilin kami nga mapainubsanon. Itugot nga maablihan ang among mga kasingkasing, tin-aw ang among mga hunahuna, sa mga butang nga iya sa Dios, kay amo kining ginapangamuyo sa Ngalan ni Cristo.

²⁰⁶ Samtang nakaduko ang atong mga ulo, aduna ba kaha og gustong mahinumduman sa pag-ampo, alang sa kaluwasan sa inyong kalag? Mahimo mo bang ipataas ang imong kamot, ingon nga usa ka makasasala? Panalanginan ka sa Dios, batan-ong lalaki. Aduna pa ba? Panalanginan ka sa Dios, dinha sa luyo, sir. Panalanginan ka sa Dios, gining. Aduna pa ba'y gustong mahinumduman sa pag-ampo karon mismo, alang sa inyong kalag? Panalanginan ka sa Dios, sir, nga nagpataas sa imong kamot. Ug panalanginan ka sa Dios, ug ikaw pud dinhi. Maayo gayud. Aduna pa ba'y usa, sa dili pa kita magtapos? Nabati ko nga aduna pa gyud. Panalanginan ka sa Dios, dinha, sir, nga anaa sa luyo.

²⁰⁷ Ania, karon tan-awa n'yo, aduna ako'y ihangyo sa inyo. Ayaw kong hunahunaon ninyo nga tungod kay ania kita dinhi niining gamay'ng tabernakulo. Ayaw kong hunahunaon ninyo nga tungod kini sa niining mga tawo. Ug sa maloloy-ong Dios, ayaw n'yo hunahuna nga tungod kay nakuhaan ako og retrato uban ang Manulonda sa Ginoo, ug ako . . . ug—ug mora'g ingon niana, para himoon kini. Oh Dios! Kung ingon niana man ang akong gibati, nan, igsoon, kinahanglan kong maanaa diha sa altar imbis nga mohangyo kaninyo. Apan ginasulti ko lang kini, ginasulti ko lang kini pinaagi sa Kasulatan, aron nga inyong makita nga kini mao gyud ang Kamatuoran. Kung gisulti ko Kini, ug nga ingon niana lang, nga sama ra sa ubang magwawali o kung kinsa man, o si kinsa pa man, bueno, kung ingon-ana, lahi na kana. Apan makita man ninyo ang maong hulagway, ang Dios nga nagabalik mismo ug ginapamatud-an nga Kamatuoran kini. Kita n'yo? Mao kana ang nagapahimo Niini nga tinuod, tungod nga ginapamatud-an Kini sa Dios. Ug usab, dili lang kana, kondili ginaingon mismo sa Iyang Pulong nga pagabuhaton Niya kini. Ania Siya nga ginabuhat kini.

208 Karon kung dili pa kamo matarung, kon ang inyong kasingkasing dili pa matarung sa Dios, mahimo n'yo bang ipataas ang inyong kamot? Moingon, "Iampo ako." Sige, dinha mismo sa inyong nahimutangan. Mga walo o napulo ka kamot ang nagpataas, nga nagatinguha og kalooy alang sa ilang kalag. Samtang ginaduko n'yo ang inyong mga ulo, mag-ampo kamo karon. Hinumdumi n'yo, nga kamo mismo ang maghinulsol. Igo lang akong nagapangamuyo para kaninyo, nga malooy unta ang Dios. Apan dinha ang altar, gidala kamo sa Dios diha sa usa ka bahin sa inyong hunahuna; kana mao ang altar. Nagatoo kita sa pagduol nganhi sa altar, oo, apan dili kana—dili kana. . . Maayo man kana. Apan ang inyong tinuod nga altar mao man ang bahin kon diin kamo gihinagbo sa Dios. Ug gitagbo Niya kamo mismo dinha sa inyong nahimutangan. Mao kana ang inyong altar.

209 Karon isulti n'yo, "Dios, malooy Ka kanako, nga usa ka makasasala. Ug sugod niining adlaw, kung tabangan Mo ako, magkinabuhi na ako para Kanimo. Akong—akong alagaran Ikaw. Dili ko igsapayan kung unsa ma'y isulti ni bisan kinsa, nagaduol gyud ako, niining buntaga. Nagaampo ako dinhi mismo, nga tangtangan Mo unta kanako kining dugay nang mabagison kong espiritu. Tangtanga kining akong pagkamainiton sa ulo. Nasayod ko nga dili ko puede manglihok nga ingon niana ug mahimong matarung sa Dios. Ug aduna pu'y pagdumot sulod sa akong kasingkasing. Duna ako'y kasina. Adunay pagkamadinauton sa ako. Aduna ko og *ingon-ani*, *ingon-ana*. Tangtanga intawon kini, Dios. Dili ko gusto nga mahimong ingon niana. Himoa akong malulot, ug mapainubsanon, ug maaghop. Himoa akong malumo. Himoa akong usa ka tawo nga makapangkabig og ubang tawo paingon Kanimo. Itugot nga makahimo ako og usa ka butang alang Kanimo aron ipakita ang akong mga pagpasalamat dinhi sa akong kinabuhi." Ingon-ana nga pag-ampo ang igaampo n'yo karon, samtang dungan kitang magaampo.

210 Langitnong Amahan, Imoha sila. Sila ang mga bunga sa Mensahe niining buntaga. Gipataas nila ang ilang kamot. Adunay nagtuklod kanila nga buhaton kana. Ilang—ilang gibatokan ang balaod sa grabitasyon sa dihang gipataas nila ang ilang mga kamot. Adunay espiritu sa sulod nila nga mao'y nagdesisyon. Gipataas nila ang ilang mga kamot, aron ipakita nga ila nang gidawat ang Magbubuhat Nga nagbuhat kanila.

211 Karon, Langitnong Amahan, ginaampo ko nga panalanginan Mo sila, ug hatagan sila og Kinabuhing Walay Katapusan, karon mismo. Wala ko'y unsa man nga mahimo; tawgon man sila diha sa may altar, ipahimutang sila sa usa pa ka lawak, buhaton man kini tanan. Pero Ikaw mismo—mismo ang gikinahanglan para mahimo kini, Ginoo. Wala kami'y unsa man nga mahimo gawas sa pagwali sa Pulong. Miingon Ka, "Ang pagtoo nagaabot pinaagi sa pagpatalinghug, sa pagpatalinghug sa Pulong, sa

Pulong sa Dios.” Karon, amo nang nawali ang Pulong, ug gipataas nila ang ilang mga kamot, ingon nga mitoo na sila Niini. Karon ihatag kanila ang Kinabuhing walay katapusan, tungod kay gisaad Mo man nga Imong buhaton kini. Kung matinud-anon sila sa pagpataas sa ilang mga kamot, nan mogawas sila niini nga bilding karong buntaga, nga usa na ka malulot, maaghop, mapainubsanon nga Cristohanon, tungod kay gisaad Mo kini. Ug dili man mahimong mapakyas ang Imong mga Pulong. Ginapangamuyo ko kini sa Ngalan ni Jesus Cristo. Amen.

Now I am watching, waiting and longing,
For that bright City John saw coming down.
In that bright City . . .

Magsimba na tà karon.

. . . pearly white City,
I have a mansion, a harp and a crown;
Now I am watching, waiting and longing,
For that bright City John saw coming down.

²¹² Dili ba ginahigugma n’yo gayud Siya? Tapos na ang mensahe, karon. Pagsimba na kini. Wala kita nagaanhi sa simbahan aron lang magpatalinghug sa mensahe. Kondili nagaanhi kita aron sàb nga magsimba. Ayaw lang hunahunaa ang inyong katapad. Simbaha lang ninyo Siya. Oh, pagkaanindot gayud! Pagkamaayo! Isulti n’yo lang Kaniya diha sa inyong . . . Dili man ninyo kinahanglang isulti Kaniya nga lanog. Isulti lang Kaniya sulod sa inyong kasingkasing, “Gihigugma ko Ikaw, Ginoo. Pasayloa ako sa akong sala.” Oh, kanindot!

. . . pearly white City,
I have a mansion, a harp and a crown;
Now I am watching, waiting and longing,
For that bright City John saw coming down.

²¹³ Among Amahan nga Dios, dawata intawon kami. Nagahulat kami, samtang nagapatalinghug kami sa Pulong, nagatinguha. “Ang among mga kasingkasing nangandoy sa pagpangita Kanimo, ingon nga ang lagsaw nangandoy sa pagpangita sa tubig. Ang among kalag nangandoy sa pagpangita Kanimo, Oh Dios.” Nagatinguha ug nagahulat, nagahulat sa takna nga moabot na si Jesus, nagahulat sa panahon nga pagatawgon na kami ngadto sa kawanangan. Dili aron mobarug sa atubangan sa Maghuhukom sa paghukom; tapos na kana. Mga patay na kami sa mga butang nga iya sa kalibutan, ug misulod na kang Cristo, ug giangkong na Niya ang paghukom kanamo. Siya man mao ang among Abogado karon, sa lingkoranan sa hustisya. Ang among mapanalanginong Abogado, nga, sa among pagsugid, ginapangaliyupo Niya ang among kaso hangtud nga masayran namo nga dili kami takus. Sama sa gisulti sa minahal nga igsoong babaye karong buntaga, sa iyang

testimonyo, ug samtang nagabutang sa iyang kuwarta, “Sukad nga nakatambong ako dinhi nasayran ko nga dili Kini akoang pagkabalaan, kondili ang pagkabalaan kini sa Dios.”

²¹⁴ Tinuod gayud, Ginoo, among ginatudlo sa mga tawo, nga walay unsa man nga maayo sa tawo, wala ni usa ka butang. “Unsa ba ang tawo nga Ikaw mahunahunaon man kaniya?” Apan tungod gyud sa grasya sa Dios nga nagpakita kanamo. Ug sa Iyang mga maayong buhat lamang kami nagasalig, dili sa among kaugalingon. Ug ginasimba Ka namo, Labing Balaan nga Dios, tungod sa Imong pagkamaayo, nga giapil Mo kami sa Imong halangdong Gingharian, sa Imong mga mahimayaong plano. Ginadawat Ka namo dinhi sa among mga kasingkasing, pinaagi’g pagtoo. Ug pinaagi sa grasya, nagatoo kami nga Imo kining gihatag nganhi kanamo alang sa kahimayaan sa Dios, alang sa buluhaton sa Dios.

²¹⁵ Karon, Ginoo, ayoha ang mga may sakit samtang magaduol sila para maiampo, niining buntaga. Ihatag kanila ang maong kalipay, nga ginatinguha nila nga mamaayo na. Ipahibalo kanila nga kining gamay, diyutay’ng balatian nga gipapas-an sa ilaha, usa lamang ka hamubong panahon sa pagsulay. Hingsayran sa Dios ang tanan mahitungod niini. Gibuhat Niya kini aron makita kung unsa ang among pagabuhaton bahin niini. Daw sa unsa nga ang Dios . . . Hinaut nga motikang na sila dinha ug angkonon ang tapos na nga buhat! Hinaut nga Imong . . . Hinaut nga dili Ka nila hagiton, pinaagi sa pagdagan-dagan *dinhi* ug *dinha*, ug *gawas* ug *sulod*, “Bueno, wala ako mahibalo *niini*, *niana*.”

²¹⁶ Ginoo, hinaut nga mobarug gayud sila nga matinud-anon, moingon, “Ginoo, Ikaw Mao ang nagluwas kanako. Ikaw Mao ang nagbuhat niining mga butanga para kanako. Nagatoo ako Kanim, ug nagasalig ako Kanim, karon.” Ug ginaampo ko nga itugot Mo kini alang sa mga tawo, sa Ngalan ni Cristo. Amen. 

57-0901M Mga Hebreohanon, Kapitulo Tres
Branham Tabernacle
Jeffersonville, Indiana U.S.A.

CEBUANO

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®. Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org